

卷一

11



沈南疑先生樵李詩繫第四卷目次

平湖 金 南鏜 夏聲 校閱

元

張文穆公伯淳五首 陸徵士正一首

學易先生俞鎮三首 屠學正曾一首

水邨隱居錢重鼎一首 高升一首

錢應庚三首聯句一首 楊宣慰梓一首

譚復一首 梅花道人吳鎮十六首

竹林處士陳堯道三首 竹莊人吳瓘一首

過布衣宗一一首 文山隱人陸容一首

陳布衣寶生一首 沈孝隱嗣昌一首



俞推官庸四首

寄亭樓老陳秀民二十二

首

錢布衣大有一首

葉提舉廣居五首

芝林居士鐫堪三首

陸學正景龍十五首

陸學正德方一首

聽雪徵君孫固一首

顧教授琛四首

俞平江俊四首

沈南疑先生攜李詩繫第四卷目次終

沈南疑先生攜李詩繫第四卷

平湖 金 南鏜 夏聲 校閱

元

張文穆公伯淳

伯淳字師道崇德人少舉童子科與內弟趙孟頫

人品相望舉咸淳進士至元中世祖遣程文海訪

求江南人才伯淳與孟頫並被薦入見世祖問冗

官風憲鹽筴楮幣對皆稱旨命至政事堂將重用

之固辭授翰林直學士詔令皆出其手同修國史

謁告歸卒謚文穆有蒙養集虞集為序其詩文耻

尚鉤棘春容紆徐鏗乎金石之交奏也



題太初壽星

北方有名画吾愛馬雲章昔年遭亂離流落向武昌孟氏授館粲游戲翰墨場作此壽者相瞳碧髮毛蒼瑞芝生坐石清心炷妙香珍襲知幾年上射牛斗光車書混一後發此屋壁藏吾宗夢符君得之猶珪璋思與博雅共傳寫入縑緙伊誰會筆意述者趙子昂毫髮無少差後先相頡頏太初天下士展卷懷故鄉持此安所施素壁映高堂人事有分合精藝足流芳托物尚可傳况乃名譽彰願言斯文壽天地同久長

子入京

我昔到京師幾度望清光日食太倉粟亦有大官羊承

恩入翰苑竊祿三載強絲毫無補報轉頭松菊荒我歸爲丘隴駒隙雙丸忙及瓜不求代日星垂條章求閒遂得閒初志或小償未老苦多病勸翼甘回翔箕裘汝當勉弓冶本非良去去都門道絕勝鑑湖涼土淡氣候齊不同瘴癘鄉然於飲食間過多亦爲殃揚沙風力勁外邪襲空腸迷惑非一端蕩則流於狂此行分寸進造化在廟堂奔走形勢途無益多所傷交遊不厭審非類宜淡防計日需汝歸秋風蓴鱸香顧步無小差所到未可量

題于越亭送梅君石秘校詩後

聖俞先生宣城裡經行修明教胄子不特詩名滿世間



紀載精詳繼前史當時晦叔誦其文曰二百年未有此  
先生泰山北斗然管窺蠡測難爲言我從聞孫見手澤  
定知家學來根源繭紙可腐石可泐世美自有不朽存

送李公畧

風雪滿吟鞍長江望眼寬宦清騰踏易聚久別離難人  
去鶴應怨冬淡梅不寒暮雲依舊碧幾度倚闌干

賈氏望梅樓

寂寞千巖萬壑秋欲窮望眼更登樓曾觀海者難爲水  
自出山來無此遊前代衣冠隨世運故園草木染春愁  
重門淡閉閒庭院難掩當年富貴羞

陸徵士正

正字行正自號率齋居士本名唐輔居海鹽之當  
湖今析平湖豐頷長耳端毅寡言精於律呂象數之學與  
華亭謝國光皆有重名程文海求見兩人俱稱疾  
不出後復與劉因同徵不赴隱居教授著正學編  
樂律攷七經補註至治三年卒門人私謚靖獻先  
生

古意

結禱事君子誓作形與影人事多乖離彼此睽燕郢尺  
書沉素鱗嗥鵲催逝景妾命詎終薄君心那得冷開簾  
花撲面淚落紛如纒

學易先生俞鎮



鎮字伯貞崇德人習朱輔之學為傅貽書院山長  
 至大中江浙行省薦授華亭教諭延祐間鄉舉第  
 一官至建德路知事其行草師李北海學通五經  
 尤精於易得其指授盡為聞人嘗榜其居曰學易  
 門人私謚為學易先生有修辭稿富春吳見心復  
 有題俞伯貞乘槎圖詩云瀛洲獨步玉堂仙曾從  
 靈槎上九天天上歸來人不識河源錯認漢張騫  
 延陵義塾詠桂 考見題咏  
 西風起巖幽白露下藂薄朝看木槿榮夕見芙蓉落檀  
 欒月間桂歲踐中秋約仙葩獨紛披芳宴競疇酢瓊宮  
 實高寒之子真綽約如來金粟影大士珠璣珞何年分

化離此地樹寥廓語溪古多士往者我先覺陳門列三  
 魁莫氏敷五萼丹青翼堂構朱紫耀城郭鉅筆上高懸  
 靈根下盤錯事叶燕山碑調高淮南作孫枝日長大爽  
 葉陰綿邈終成仰攀志豈但延賞樂相期醉浮螿半夜  
 駢鳴鶴往持吳劄斧竊試嫦娥藥勿謂我言狂詩云善  
 戲謔

送崇德同知蔣蔣山滿解

法吏多慘黠文儒或迂拘世有弘達才奚必吏與儒蔣  
 君西湖彥身依北辰居皎質燦瑤枝清標瑩冰壺明於  
 鏡發奩圓若盤走珠貳州江湘表攷績政已殊剽劇來  
 禦兒依然發劄初儒宮新作興吏牘弊盡除惠澤到閭



閻愁歎成歡呼我歸從武林屬君方下車流氓方復業  
矧我冠帶徒月吉會講席旬休挈行厨登臨境增勝談  
笑訟遂無俄復三載過去作九萬圖非云重離別願言  
惜居諸鵬隼鷲擊用棟梁廊廟須努力酬主恩揚名報  
親劬盡職乃人臣素餐非丈夫我當握簡札采掇歌誦  
餘上陳良史官爲君細細書

### 大腹兒

塵巫夜禱軋犂山淫光下燭穹廬寒柳城胡兒不敢睡  
四野惡聲嗥狗犴猪龍怒磯老臬腹鱗甲粗疎頭角秃  
婪酣大肚三百斤偷得真龍半分福范陽氈帳妖潛形  
平盧寶刀遲發劓金雞口吐東北赦青螺啼作西南聲

鳳皇春池金鏡破獬豸霜臺胡眼大東風野鹿嚼楊花  
白日妖狐登御座華清玉甃湯作泉洗兒果撒黃金錢  
并刀剪綵十大幅錦裯墜碎宮娥肩象牀夜冷嬰兒哭  
猪龍爪破金訶玉香齧不痛荔枝漿雄心已飽雞頭肉  
長安天奪蜜口臣銅頭鬼鼓漁陽塵赤心一夜變胡腹  
二十四郡俱無人潼關夜漏雞聲早馬嵬坡下冰山倒  
劒門西寄杜鵬巢練帶玉環埋翠草嘉山土門勒戰功  
猪兒帳下屠猪龍旄頭星落大腹破機上鸞刀一尺紅  
屠學正曾

曾字體寧小名一郎母樂夢王曾而生故名世居

海鹽乍浦北里許土家山永福巷後析平湖宣慰楊耐翁



壻也少受書於吳艸廬延祐中江浙行省薦為學  
教諭至治癸亥中浙江東榜第一有虞廷慶雲賦  
為藝林稱重授建康學正不就隱於家吳元年籍  
沒楊氏其家遷避齊景鄉黃泥堰康僖公其裔也  
慶雲賦歌

溯厥皇虞敷天孝德蒸乂格姦祗載夔粟當宁升聞班  
寮師錫有鰈登庸側陋皇赫徽典叙揆賓門覲辟左禹  
右皋前稷後益愠解八風教訖四極

水邨隱君錢重鼎

重鼎字德鈞自通川徙居嘉興分湖之涯後析嘉善構水  
邨聚書其中趙子昂為作水邨圖一時名士俱有

詩題之選存題咏卷中

題高士圖

在昔洛陽雪深丈餘士也高臥來令尹車今年吳淞雪  
復何如積素一色鷗鷺有無之子江皋修亭是居有琴  
有書有酒有魚賞靜獨眺聊以自娛挹茲清風凜凜起  
予此景此圖再卷再舒

高升

朱太史彞尊以金蘭集見示云此係里人因載入  
題徐良夫畊漁軒

山中遂高隱累世業畊漁江浦晚潮急湖田春雨餘自  
緣甘澹泊何用借吹嗟他日投簪去多君為卜居



索臘梅花

蠟花的的猶緘綠應向山家十月開歲晚書窗甚寥落  
誰能為寄一枝來

錢應庚

應庚字南金郡邑志皆失載邵復孺螿術集中有  
襄南金往海鹽省母詩有荅南金知近寓秀水僧  
寺詩有寄錢南金孝廉詩又有句云美人只在寒  
雲外破屋依然谷水西南金又嘗居茜涇今屬嘉善境  
舊選惜無南金全作止錄聯句一首閱鐵網珊瑚  
載復孺貞溪詞翰內有數詩復採存之

會合聯句

久別情衷在邵重逢意氣添窮途仍遠役錢吾道豈終  
潛遲暮身何補邵艱危首尚黔客情鄉態別錢人事物  
華兼豹隱曾誰見邵雞群適自淹故交淡閱錢高誼  
薄閭閻歲晚詩無恙邵夏遙夢屢瞻盍簪長此地錢翦  
燭近肯檐近况俱相問邵幽期已素占真成談豐豐錢  
夏復坐檐檐弱冠交遊早邵通家學問漸訂頑唯汝益  
錢知已不吾嫌春浦隨風鷁邵秋堂滴露蟾楚蘭愁共  
擷錢湘管醉重拈邨市魚蝦美邵盤餐筍蕨甜望雲歌  
白苧錢蹋月認青帘靜賞花當戶邵微吟艸入簾平煙  
孤野濶錢落日九山尖竹影棋枰潤邵苔痕屐齒黏風  
流原不算錢文采頓能欣芸業猶生計邵瓜田僅養恬



索居期自奮錢微祿覲同霑俗薄輕遺佚邵時清愧孝  
廉每驚巢幕燕錢殊比上竿鮎屈賈時多忌邵商韓世  
不厭固窮君子拙錢競進小人儉璞玉甘淡韞邵鉛刀  
苦較銛淳風難返古錢澆態日疑炎汨汨知何益邵蕝  
蕝獨好謙富應同土苴錢貧不厭藿鹽暴白心如鐵邵  
雌黃口草箝妙年咸仕版錢長晝只書幃坐欲彈冠起  
邵耕期束帛覘壯衷從曠遠錢短髮任髻鬢未屬麒麟  
画邵恒韜滌豹鈴淹留頻撫髀錢慷慨亦掀髯但得襟  
期在邵何憂歲月穢匆匆投井轄錢忽忽報郵籤江海  
無忘險邵冰霜已戒嚴詩篇相砥礪錢友愛辱鍼砭邵

荅復孺

與君相知最相憶春水東流春望淡十年共坐燈火約  
兩地忽牽江海心日落瞻烏誰屋上月明夢鶴故城陰  
蘼蕪滿地不可寄何以報此瓊瑤吟

閏正月得復孺先生去冬寄襄詩次韻奉荅

忽見新詩慰澗疎好衷憐爾獨思予無由橫泖同垂釣  
依舊匡山借讀書自惜交情嗟老矣即今世事轉紛如  
西園寂莫梅花路腸斷春風處士廬

題仲圭墨菜

老吳嗜好素淡泊戲画晚菘三尺強江南物價正騰踊  
山中此味偏悠長冰壺立傳貴適口碧澗作羨聊塞腸  
自古食焉難怠事吾儒莫羨大官羊



楊宣慰梓

梓世居海鹽。澈川以豪富稱。元時爲宣慰使。節俠風流。尤善音律。與武林阿里海涯之子雲石交善。雲石善歌。能製樂府散套。梓得其傳。雜劇中有豫讓吞炭。霍光鬼諫。敬德不伏老。皆其所著也。嘗建樓十楹。以貯姬妾。今稱宣慰粧樓云。

過湖登樓

樓前秋水健帆開。樓外秋風舞袖回。萬里梯航通鳥道。四時風雨護龍堆。江山如此不一醉。歲月幾何能再來。欲問老髯求鐵笛。夜深吹上紫荆臺。

譚復

復嘉興人。詩見元音。有見心小草。

寄玉筍劉師復道士

玉筍峰頭玉作人。梅花壇下讀丹經。曉分露水洗明月。夜掃雲洲拾落星。海鳥近傳鳧逕度。泉琴誤許雀同聽。何當謝却塵中鞅。共倚松根斷茯苓。

梅花道人吳鎮

鎮字仲珪。嘉興魏塘人。後析嘉善性高介。善画山水竹石。

題詩其上。時號三絕。富室求之多不得。唯贈貧士。使取直焉。作字用画筆。如寫竹狀。饒有天趣。自號梅花道人。方元之。季類。多高隱。倪元鎮居梁溪。楊廉夫居干將。陶南邨居泗涇。張伯雨居勾曲。黃子



久居琴川。顧阿瑛居玉山。然皆風流縱誕。廣延聲譽之士。片紙一出。標榜互高。鎮獨匿影窮鄉。日與羽流衲子爲群。時或垂簾賣卜。言多警世。沒於至正。中年七十五。自題其墓曰。梅花和尚之塔。人恠之。曰。久當自驗。未幾。楊髡毀掘諸墳。疑爲緇流。竟免。今名梅花里。即其故居與埋玉處也。詩夏清逸可誦。

松石圖

硯池漠漠吐墨汁。蒼髯呼風山鬼泣。濤聲破夢鐵骨冷。露影濡空翠毛溼。徂徠千樹老雲煙。湖山九里甘蕭瑟。何當閱此明窗下。長對詩人弄寒碧。

畫竹

與可畫竹不見竹。東坡作詩忘此詩。高麗老繭冰雪冷。戲寫歲寒岩壑姿。紛紛蒼雪落碧篠。謾謾好風扶舊枝。猗猗頭角易變化。細聽夜淡雷雨時。

食菜蘘戲作

菘根繞地翠光濕。雪花翻起玉脂泣。蕪萋金谷已塵土。美人壯士何顏色。山人久刮龜毛氈。囊空不貯椰掄錢。屠門大嚼知流涎。淡中滋味我所便。元修元修今幾年。一笑不直東坡前。

題画

平林方漠漠。野水正湯湯。蒼葦日欲暮。年衰客異鄉。草



店自迴合邨路迂夏長渡頭人散後漁父正鳴榔

題竹三首

湘妃祠下竹葉葉著秋聲鸞鳳青霄下吹簫坐月明  
陰涼生硯池葉葉秋可數東華客夢醒一片江南雨  
短梢塵不染密葉影低垂忽起推篷看瀟湘過雨時

青浮山

孤山七十布西東水面奇形獨不同幾向峻嶒高處望  
青螺浮在太湖中

畫竹八首

葉葉如聞風有聲盡消塵俗思全清夜淡夢遶湘江曲  
二十五絃秋月明

愁來白髮三千丈戲寫清風五百竿幸有穎奴知此意  
時來几上弄清寒

長憶前朝李薊丘墨君天下擅風流百年遺跡畱人世  
寫破湘潭夢裡秋

春到龍孫滿地生未曾出土節先成可憐無箇伶倫眼  
鎮日垂垂獨自清

低垂新綠影離離倚石臨泉一兩枝憶得昔年今日見  
鳳皇池上雨絲絲

動輒長吟靜即思鏡中漸見髮絲絲心中有箇不平事  
盡寫縱橫竹幾枝

倚雲傍石太縱橫霜節渾無用世情若有時人問誰筆



橡林一箇老書生

瀟灑琅玕墨色鮮半含風雨半含烟恠來筆底清如許

老子胸中想渭川

竹林處士陳堯道

堯道字宗遠自號竹林處士嘉興人隱居不仕與

楊維禎等倡和沒於元季有竹林集子約綱繹緝

皆能詩語溪朱志道有喜宗遠復入虛白齋詩云

竹林先生陳夫子白髮鬢髮垂兩耳著書眼似秋

月明為文思入清冥裡近來學得神仙術欲向山

中食石髓世間自有仙人居何必蓬萊三萬里先

生一去竟莫迴我嘗勸之留不止如何擘破山中

雲却被茅君詔招起月泉吟社詩刻內載陳堯道

一首係義烏人存之俟考

松瓢齋為王好問賦

身外纖微皆長物一瓢飲足寄蒼虬壺中日月懸林表

天上匏瓜下礪幽器大從來成濩落時危那復事沈浮

只憂尚渴陶唐化未放先生學許由

挽邁里古志

小范胸中有甲兵檀公身後壞長城大星墜地中軍愴

白馬憑潮霸主傾碧血不隨金石化丹心長貫斗牛明

會稽高與浯溪並誰與磨厓刻姓名

春日田園雜興

見月泉吟社



化日邨田樂春風畊織圖秧肥蚪蚪動桑暗鶉鳩呼罷  
社翁分胙占蠶媪得符傍花隨柳處此事不關吾

白竹莊人吳瓘

瓘字瑩之隱於嘉興魏塘今析嘉善構竹莊居之自號

竹莊人善畫梅仲圭題曰吾鄉達竹莊人得逃禪

鼎中一嚙咀之嚼之淡有所得寫竹外一枝索拙

作繼和予不能追古人萬一自笑東隣之效顰醜

矣語與詩俱見鐵網珊瑚

余之作梅聊自吟嘯豈在悅人心目適唐明遠求

作寫一枝以贈今置之禹功後何堪依附古人

而圭翁序之故復作一詩題於後

逃禪親授寫梅法二百年來徐禹功竹外一枝清絕處  
孤山風雪夜濛濛

過布衣宗一

宗一字貫之海鹽當湖人今析平湖早喪父獨與母居至

正間張士誠陷姑蘇聞其才遣使迎之以養母辭

尋以兵劫遂負母逃海上欲殺其母乃以身蔽面

中數創賊憐其孝舍而宥傭以給食母卒六年不

克葬寢苫服哀不變有白燕巢其室明初事聞建

坊旌之

顧邑城

寄奴王者亦英雄夏愛風流老顧榮今日孤城滄海畔



一天紅浪晚來風

附考顧邑一作故邑在乍浦故邑山下顧榮之先勾踐支庶封此子孫以為姓漢順帝時海鹽縣陷為當湖移治此山下尋徙馬嘔因名馬嘔書劉裕追孫恩築城于此有驍將虞丘進居城養創按越絕書吳王伐越敗兵樵李大風發狂日夜不止車敗馬失騎士墮死大船陵居小船沒水匹馬啼嘔事見吳史夫差駭問子胥胥曰風北來助我越必敗後人因以馬嘔名其城云城在海鹽縣東南一百步水經注曰谷水之右有馬嘔城故司鹽都尉城吳王渙煮海為鹽于此晉咸康七年移縣治于此

及山隱人陸容

容字景遠居崇德及山之北今析構來青堂于兩峰

間吟諷自樂貝清江遊及山記中云訪陸生於來

青而生以事出其子煮茶來獻乃啜二甌

來青堂

我來已過看花時剛到中秋未是遲縱使芙蓉零落盡

北窗還有耐寒枝

陳布衣寶生

寶生字彥廉海鹽人父思恭客泉南娶莊氏思恭

賈海而死莊攜孤歸鹽守節寶生少有才名好為

恠體詩兼善繪事與雲間黃子久契密子久每來

必為漬筆點染山水多至二十餘幅題曰大癡道

人為彥廉先生畫體勢大較飛筆走墨山骨峻峻

無事皴法翠微赭脚淡遠濃樹而幅必以淺藍染

空若高穹下冒也後寶生作春艸堂於婁上以奉

母遍請名人詩文以傳之又居峽石東山以父溺

海終身不至海上子久來鹽嘗拉之觀濤偕至東



城輒涕泣。子久動容，亦不看而罷。因爲作仇海賦記其事。

題石民瞻鶴溪圖

雙雀翩翩入太清，溪流不盡松風聲。髯翁筆底有仙路，倩渠夏寫芙蓉城。

沈孝隱嗣昌

嗣昌字壽康，元季居海鹽豐山之南。早喪母，事父曲謹。父沒，勺水不入口者三日。既葬，搆廬其側，覆以編茨，障以土垣。日匍匐望親壟，以泣。南臺論薦，官之不就。洪武元年卒，邑令造廬旌曰孝隱。至今名其居曰孝隱邨。

誦離騷經

叢蘭芳芷滿東皋，閒步春風讀楚騷。忽憶靈均發幽憤，墜屣幾折沈郎腰。

俞推官庸

庸字子中，號凝清齋，嘉興人。爲平江路推官，有惠政。淮兵墜境，庸募卒守城。郡僚高安等欲竄，庸厲聲曰：公等以世臣守大城，一旦臨利害，先民逋逃，不顧義與恩耶！高安持鐵簡擊庸仆地，遂開門。兵入，執庸置馬下，頃之，甦以計脫去。間道而歸太府，將授以爵，辭曰：吳門之役，吾有死所，今日之生出，不卒耳。尚負面授他命，見天日乎？因憤病卒。



病起口占

憶昔辭家塞北遊，朝來何事怯新秋。  
牀堆藥裹塵侵几，風靜書窗月滿樓。  
伏櫪長鳴憐老驥，引杯含淚惜吳鉤。  
旌旗明滅西城路，落日長烟起暮愁。

堵無傲討賊，獲功任金壇縣尹。久別無信，作此寄之。

春入椒盤歲復除，故人不寄一行書。  
虎頭年少方投筆，鶴髮慈親正倚閭。  
鵬鸚雲霄揚羽翮，犬羊巢穴悉丘墟。  
丈夫出處皆肯定，莫向明時較疾徐。

次韵陳伯昂見寄

關河瑟瑟暗烽烟，矯首遐觀獨悵然。  
徒見舟車勞驛使，

未聞山澤訪遺賢。參橫古塞初寒夜，霜滿征衣欲曙天。  
自笑儒冠只如此，窮通何必卜筵筭。

至正乙巳五月三日偕鮑恂張翼金綱訪弘道朱

聘君於集賢里弘道出蔣顥所寫翎毛索題各

賦一首

按弘道崇德人明洪武初以明經爲御史郡邑志皆失載

寒棘幽花野思深，好山無樹著鳴禽。  
自來春色濃于酒，別有高枝在上林。

寄亭棲老陳秀民

秀民字庶子，四明人。寓居嘉興感化里。至正間官武岡城步巡檢。知常熟州。張氏時爲參軍，入明不仕。自號棲老。所著有寄亭集。其詩風度邁人。綽有



古致當張氏據平江。部將呂珍守越。秀民與饒介  
之在左右。一日陳賦詩寄呂。有不驚越女之句。饒  
爲書扇。詞翰雙絕。呂倩人誦罷。大怒曰。我爲主人  
血戰守封疆。豈愛一女子。不忍驚乎。見則必殺之。  
陳基有寄陳庶子參軍兼簡饒介之郎中詩云。楚  
天漠漠水迢迢。千里懷人不自聊。帷幕喜聞延曲  
逆。行間忝竊事嫖姚。江空不採芙蓉寄。歲莫唯歌  
桂樹招華蓋。仙人如借問。爲言髀肉近多消。

送強彥栗歸吳

薊門秋月白。城頭夜啼烏。城中良家子。半是南征夫。或  
從張都護。或屬李輕車。道傍別妻子。泣下如迸珠。自非

英雄具。孰使禍亂除。戎馬暗中國。遊子將何趨。君歸慰  
父母。緊我獨何如。

褒古

兔走要離墳。狸啼闔閭墓。寶劍生土花。銀池浴秋露。迢  
迢郭西門。玉輦迷金步。

賦得靈巖

吳門有佳氣。靈巖秀而高。扶輿起中天。橫絕望四郊。築  
宮念吳王。乘舟懷越相。如聞石鼓鳴。不見西施唱。花殘  
采香逕。木落洞庭波。鹿啣如意舞。曾合步搖歌。霞邊錦  
樹明。石上琅玕長。世無赤松子。誰與共長往。金芝餌處  
士。玉蘭遺使君。煩將滄海月。還照秀峰雲。



題王長史所画天平龍門圖

月黑山鬼號蒼龍闢折角仙人一掌擎不令墮溪壑秋  
高勢峻層日暮氣慘錯闌干冰柱懸凌亂雪花落路狹  
僅通人峰寒不棲雀王侯天機峻躋攀故盤礴寫作龍  
門圖竒氣低五嶽神魚息天池有待風雷作

壬午九月九日與郭希仲紀叔維馬希遠飲周景

父晚香堂上紀畫墨菊馬鼓琴既而各賦一首

去年登堂三月三主人置酒澆春衫今年登堂九月九  
堂上主人復多酒馬生彈琴紀生画郭子題詩美如炙  
四明狂客醉欲倒菊花插帽秋光好百年節序能幾逢  
人生會合何其少人生會少將奈何爲君起舞爲君歌

歌殘酒盡更須酌莫待他年白髮多

登靈巖

寶殿鬱崔嵬華池頂上開山從太白出水自洞庭來閣  
樹聯珠璣巖花照石臺吳王清暑地邠得有塵埃

送王紫芝歸天台

誰信丹丘王道士乘風歸去骨毛輕玉芝生處冬猶暖  
銀甕開時夜亦明借使夔龍興禮樂也聞巢許薄功名  
胡麻流水他年約莫爲耽棋不出迎

濠州望古北居庸諸山

古北居庸一望中風沙滿眼亂芙蓉曦車夜轉崑崙脊  
華蓋陰移太乙峰金口水流終到海玉泉雲起又隨龍



兩京形勝今如此可擬秦關百二重

邳州

青山一髮見邳州落日雲迷故國愁  
父老空傳黃石在仙人已伴赤松遊  
乾坤不信無清氣河水胡爲尚濁流  
野樹昏鴉栖未定數聲哀角起高樓

湘鄉道中

日莫倦趨山市遠解衣聊復憇巖阿  
雲迷險道藤穿石水落懸厓艸亂坡  
木客下時人迹少鷓鴣嘯處客愁多  
向南言語憑誰辨莫問蠻方事若何

五月九日調軍入綏寧是夜宿風門嶺值雨

五月官軍入不毛重岡複嶺接天高  
小臣報國寧辭死

大將行兵無乃勞漠漠野烟曉  
魍魎陰陰山木挂猿猱  
二夏風雨來關峽自喜挑燈看寶刀

送陸德中赴海鹽知州

陸侯有仙骨晚歲學長生服氣歸元海  
遊神入太清渴唯餐玉露飢不飯青精  
酒後頻看劍愁來卽洗纓宦情聊復爾  
江海一麾輕

園隱爲方以常賦

爵祿不在念丘園計已成池虛芸閣靜  
地僻艸堂靈鐵甕花前灌荆扉柳下扃  
蘭芽含土碧菜甲蓋畦青襪禊春沾雨  
遽篠夜見星避人修稗史教子讀牛經  
角角雞登樹翩翩鳥下庭神交陶靖節  
自喜酒盈罌



西湖竹枝歌

鴛鴦宛在水中央恰似阿儂初嫁郎  
擲却郎君金彈子勸郎切莫打鴛鴦

吳中桺枝四首

吳門二月桺如眉誰家女兒歌  
桺枝歌聲嫋嫋嬌無力恰如楊桺好腰肢

長洲宮苑草離離中有吳王舊沼池  
至今二八吳中女爲人歌舞學西施

館娃宮中花似雲館娃宮外酒如春  
花前把酒花下醉莫遣春愁惱殺人

姑蘓城邊楊桺絲千絲萬絲垂參差  
桺絲雖長不禁手

難織迴文錦字詩

周元初來雀詩

天外誰呼衆雀來壇前道士本仙才  
月明遼海通三島能載飛瓊數往迴

烟波晚棹圖

東林待月月未出長江走烟波  
着天青山回首不可數幾點白鷗飛過船

陪同同待制遊南城

城南百花開滿洲城中主人招我遊  
急喚吳姬歌小曲莫令花落起春愁

寄紹興呂左丞



後來江左英賢傳。又是淮西保相家。見說錦袍酣戰罷。不驚越女采荷花。

錢布衣大有

大有字明遠嘉興人。始恨詩不工。自念曰杜甫云。讀書破萬卷。下筆如有神。吾患讀書不多。不患作不工也。既而于書無不讀。下筆流暢。輒與前異。楊鐵崖稱其善學。

西湖竹枝詞

淡黃裙子縷金衫。長髻垂肩短鳳簪。不願燕京嫁官去。花枝草蔓自江南。

葉提舉廣居

廣居字居仲嘉興人。天資機悟。才力絕人。與鄉人張翼劉堪爲文字友。仕至浙江儒學提舉。晚年築室西泠橋。陶情詩酒。有自得齋集。

題范寬画卷

范翁作画絕代無。巖壑交錯青珊瑚。玉堂仙人妙題品。千載見題如見圖。亂後圖書絕狼藉。奇珍委地無人識。蕭條錦繡世間稀。拂拭墨痕三嘆息。

題崔氏友竹卷

璠芳絕交亦已久。忘形三逕相追攀。高軒時過翠羽蓋。美人或贈青琅玕。清風慎截鳴鳳琯。滄海勿垂釣鼈竿。一朝群才盡登用。空山無人同歲寒。



寄楊鐵崖

聞道西湖載酒還，飛瓊弱翠擁歸鞍。可無私夢登金馬，剩有春聲到玉鸞。異國頓消鄉井念，小堂新作画图看。野人未納彭宣履，獨向清溪把釣竿。

自題隱居

瘦木裁冠鶴竚輕，十年塵土厭飄零。小山舊隱雲封戶，大藥新成月滿庭。丹井夜交龍虎氣，碧霄春躡鳳皇翎。西風客舍炎歊淨，凝讀琴心內景經。

西湖竹枝詞

水長西湖一尺過，湖頭狂客奈愁何。鯉魚吹浪楊花落，聽得櫓聲歸思多。

芝林居士鐫堪

堪字子輿，嘉興魏塘人。今析嘉善居王帶隱居讀書，工文詞，尤善古隸，不習宦學，以易授徒。有芝林集。

費烈女吟

永康費氏女，年少十八九，擇對無可人，真心似瓊玖。禮法以防身，絲麻常在手。至正十七載，太歲次丁酉，逆賊從身來，旌旗搖北斗。三巴數十城，皆降不敢後。唐姬與姜氏，以漸爲賊偶。費女涕泗悲，勤勤告父母。人生棄禮義，猪狗亦何有。我身不如賊，我死骨不朽。夜深盛容飾，自縊後園柳。高義感行人，痛心而蹙首。平章買□者，左丞韓叔亨。低頭雙屈膝，拜賊乞餘生。不能受白刃，空負



朝廷恩茫茫天壤間生死義與仁泰山與鴻毛孩提知  
重輕費女生草野烈烈超凡倫二公國柱石棄去如輕  
塵芳名與汚迹遺戒千百春

擬古

千金買明珠百寶裝帶鈎寶帶縮同心明珠垂兩頭美  
人結新歡託體相綢繆再拜稱主壽持以奉千秋

題西溪艸堂

三尺茅簷壓樹低浮生聊爾作幽棲雖云身外原無地  
更有青山屬杖藜

陸學正景龍

景龍字德陽號湖峰郡志作景龍誤嘉興人至順

已已舉賢書或曰貢士官明州學正有湖峰稿不  
傳詩見元音元詩體要及敦交集詞極弘麗時稱  
其工於咏物

題趙松雪人馬圖

閣老風流世所誇揮毫寫出兩名駒玉關秋遠風生樹  
銀海春深浪蹴花一代衣冠淪草莽百年縞素颭風沙  
蕭蕭白髮鄞江上見画令人重嘆嗟

春日遣懷和吳仲圭韻

閑愁日日不能禁漫賦停雲感寸心老去一貧何至此  
春來多病到如今門前花飛萬點急湖上水添三尺深  
却喜小樓當綠樹倚闌時復聽鳴禽



寄上竹溪契家以寓衰耿之情

竹溪先生清隱處蓋湖萬頃水雲涼每聆金玉無來使  
時見墳笮有和章麥熟崆峒思續食花開杜曲憶傳觴  
西齋有客如羲獻爲致殷懃意莫忘

奉次見貽詩韻

夏蓋湖頭秋日涼碧雲遶屋見蒼筤波光入酒葡萄綠  
雨意催詩菡萏香每羨謝公能曠達也知賀老足清狂  
故人已動江湖興擬借扁舟載筆牀

過伏龍山訪諸故舊詩呈竹溪老友

江空歲晚賦停雲翦燭西窗話夜分山館無人訪遺叟  
驛亭有客送徵君寒梅近水偏饒笑老鶴昂霄自不群

明日扁舟湖上去櫂歌聲裡酒微醺

酒邊話舊情契綢繆見教二詩詞意淡至輒步來

韻以呈

隔世相逢白髮長行窩十日坐書香義熙處士遭衰晉  
大曆詩人出盛唐往事荒涼驚逝水高情忼慨惜流光  
只今故舊多淪落中夜懷人斷寸腸

百年身世累虛名一旦炎涼見薄情溝壑未應甘轉死  
干戈已卒得更生誰家明月能吹竹何處滄浪可濯纓  
但得歲寒心事在梅花滿把不勝清

畱竹溪軒賞雪

曹江三冬雪大作蓋湖七日冰不開明月墮空銀漢淺



白雲匝地玉山摧剡溪舉棹無由去  
灞岸騎驢或可來  
却羨能詩何水部肯延東閣共觀梅

故人重見高誼藹然連日倡酬不已漫賦近體奉呈

伏龍山色翠如新兵後重來訪所親喜見芝書徵國士  
尚聞蕙帳隱山人文章未信窮爲崇詩句焉能妙入神  
慰我梅花窗下酒醉中拍拍滿裛春

奉寄竹溪識趣二先生兼簡泉上架閣

下榻徐高士彈琴魏隱君相望一溪水只隔半山雲  
每憶朋簪盍俄驚客袂分登樓頻眺遠離思正紛紛

至正庚子三月七日魏處士昆季邀予遊夏蓋湖

懋福原精舍胥會者九人各賦詩一章

石橋流水放蘭舟野色蒼茫涼欲秋  
山勢截雲橫碧海  
波光吞日沒滄洲岑參羨陂客同泛  
賀老鑑湖誰復遊  
醉插花枝爭勸酒尊前一笑歲如流

柳南小隱

叅軍家住南湖上楊柳蔭門春水生  
落日樓臺看洗馬  
東風簾幙聽啼鶯長條拂翠陰垂地  
三月飛花雪滿城  
每爲論兵來好客傍人錯認亞夫營

楮拙窩

安樂窩中興淡然靈根斫得自樵仙  
地爐伏火春如海  
雪屋圍風夜似年香透玉酥和芋撥  
脂流琥珀帶松檠



絕勝沉水燒金鴨吹徹參差惱醉眠

輓普大夫

英英正氣鍾河岳赫赫高名照古今  
七道提綱徒赤手九泉飲恨只丹心  
臺空鳳去秋雲慘屋冷烏啼夜月沉  
珍重遺章猶絕筆令人一讀淚沾襟

題墨菊

東籬正色本來真子墨如何強寫神  
滿面緇塵非舊日西風羞見白衣人

題紅梅

昔醉西湖處士家酒痕吹上水邊花  
東風蛟蜨迷香夢一樹珊瑚月影斜

陸學正德方

德方字顯叔華亭人至正壬午舉人授般陽路學正未幾群雄蜂起挂冠歸時元平章河南沈照避亂鹽之甘泉鄉德方單貧徒步傭書於其家俄與談經史論時政沈大驚詢知所自遂以女妻之明初以逋臣薦不赴嘗爲詩題壁云云蔣楚樞輯我郡詩乘謂即陸景龍未知是否姑識之

武原新居題壁

我本由拳人何以寓茲土所恨國步艱一官難安堵  
流離坎壈中二天仰恃怙有妻如孟光有翁如彥輔  
灌園佐辟纁世事任旁午偶出南陌頭易姓知真主  
微服過



舊鄉官私迫門戶逃名名愈隨披裘釣溪澣夫豈蹈沉  
淵臣自甘草莽中冷烹一甌博山燒一炷彈琴伯牙臺  
聖世容巢父

聽雪徵君孫固

固字以貞海鹽當湖里人後析平湖雅志恬曠長於詞賦  
元季不樂仕進讀書顧泖之陽顏其齋曰聽雪因  
以自號豫章胡儼爲記明初辟署華亭學不赴與  
揚鐵崖陶南邨友善所著聽雪齋稿今無傳楊維  
禎有聽雪齋詩云老夫聽雪龍門寺浙瀝初聞飄  
雪多龍噴雨花天作瑞象占雲葉氣生和月明蟹  
過銀沙岬風細魚沉玉海波萬籟一空天地在誰

憐聲色老婆娑虞集有聽雪齋詩云樓前宿鷺起  
星河近歲江南雪轉多投老鍾山寒不寐滿山松  
竹夜如何陶宗儀有聽雪爲孫以貞賦云瑤池阿  
母教飛瓊細搗冰花擁佩旌郭索行沙林竹偃吳  
蠶食葉紙窗明短編清夜誰家讀柔櫓寒溪遠處  
鳴閉戶先生俄側耳松聲沸起煮茶鐺

西湖竹枝

青蓬紙蓋小花橈外湖還向裡湖搖人心好似西湖水  
隔斷中間有六橋

顧教授琛

琛字淵白一作文琛字淵伯嘉興人恃才傲物元



季入京獻燕都賦。翰長元公復初不喜。曰：今大朝四海一統，六合一家。燕蓋昔時戰國名，何燕之稱。慙恨而歸。晚年始得領教岳陽。高照庵以詩送之。云：豪氣欲吞天下士，冷官初到岳陽城。時杜清碧本應召次錢塘。諸儒者爭趨其門。琛作詩嘲之。有紫藤帽子高麗靴。處士門前當怯薛之句。聞者傳以爲笑。用紫色櫻藤縛帽而製靴作高麗國樣。皆一時所尚。怯薛則內府執役者之繹語也。一日訪僧勝福。閒遊市井間。見婦女皆濃粧。問從行者。知爲僧之寵。下此則道人所有。遂戲題一絕於壁。僧亟去之。已盛傳矣。其狂致如此。

### 遊昭亭

我出苦無騎。清晨僦輕輿。探幽得微逕。去郭十里餘。層巒拱金碧。云是神靈居。羈禽叫秋樹。族雲散晴墟。懷哉昔太守。曾此持麾旟。拂石訪遺跡。黯然步踟躕。非無歸隱心。茲焉托吾廬。壯圖一未遂。安能罷馳驅。

### 題錢舜舉畫漁翁牽罾圖

茗溪道人溪上居。一生只慣觀打魚。吳兒打魚當畊織。意匠別出絲綸餘。緯葭縛竹直水口。承以密罟防其逋。卒然一掣勢莫御。紫鱗躍出金芙蓉。蓬窗艸戶色色具。茶瓶酒椀尋常俱。船頭青山立突兀。船後綠樹搖扶疎。人間名利不可污。烟水爲席天爲廬。西塞山前晚風急。



醉踏船舷浪花入漁翁心事道人知日暮來看倚筇立  
回頭却捉秋兔豪寫入生綃半猶溼令人展卷心茫然  
辛苦微官悔何及吳淞江上鱸魚肥秋風落葉滿漁磯  
何不買舟逕東歸何不買舟逕東歸

建平道中遇雪

北風如弦雪如箭來射長途旅人面黑雲匝道天爲愁  
四望群峰白於練蕭條聚落纔百家日暮青烟起山縣  
荒林叢葦人少行斷雁殘鴉有時見憶去年少輕遠遊  
曾跨驪驪走畿甸只今潦倒困微官馬上低徊發哀怨  
丈夫事業未易論但怪流光速飛電便須大飲敵清寒  
未用悲吟歎羈賤

戲題

紅紅白白好花枝盡被山僧折取歸祇有野薇顏色淺  
也來鈎惹道人衣

俞平江俊

俊字子俊號雲東庸之子弱冠從顧淵白遊頗得  
其習負氣凌鏢當伯顏太師柄國日嘗賦清平樂  
長短句曰君恩如草秋至還枯槁落落殘星猶弄  
曉豪傑消磨盡了放開湖海襟懷休教鷗鷺驚猜  
我是江南倦客等閒容易安排手稿畱葉起之處  
後與葉交惡竟訴于官必欲構成其罪得以賂免  
初仕麗水巡檢張氏據姑蘇改判平江娶也先普



化次兄丑驢如徒居海上。入明出處未詳。

嘆息

百年同轉燭五十始知非老病侵腰脊浮名苦鼻鞮閒  
門羅可設今兩客還稀空羨茅堂燕翩翩傍母飛

楚州夜泊

漏鼓聲頻欲四更野航燈火對愁明城頭楚語驚鄉夢  
船尾吳歌動客情漠漠水雲隨雁度瀟瀟風雨自雞鳴  
離情遠道何嗟及未必江湖老此生

次高原朴見寄

年少簪花壓帽簷飛觴走筆競春纖空餘老淚青衫濕  
遮莫新愁白髮添生計有涯蠶上箔公庭無事鳥窺簾

昔人漫說揚州窄好事從來豈得兼

渡江

膺月六日狼山下浪花如雪勢吞舟隔江隱隱聞吳語  
去國遑遑學楚囚白髮慈親初屬望青衫倦客不勝愁  
幸存杜曲桑麻地敢望班超萬里侯

沈南疑先生樵李詩繫第四卷終



沈南疑先生攜李詩繫第五卷目次

元

平湖 金 南鏌 夏聲 校閱

董處士性存二首 弁山小隱黃玠十三首

黃秀才魯德十一首 蔡景傳二首

張顥一首 沈進士庭珪一首

玉山主人顧瑛十首 西溪先生鮑恂十首

王綸三首 常山長真一首

周山長致堯二十八首 卓教授成大一首

鮮于典簿樞八首 薛相士如鑑一首

濮隱士允中一首 沈元啟一首



沈南疑先生樵李詩繫第五卷目次終

沈南疑先生樵李詩繫第五卷

平湖 金 南鏌 夏聲 校閱

元

董處士性存

性存名成一字自明嘉興人居胥山鄉世雄于貲  
好施予人稱長者讀書不仕子良用良史皆穎敏  
好學治春秋會稽楊廉夫避地松江後進多從之  
遊性存因徙家上海令二子往學焉聲譽大起明  
初二子俱貴性存年八十餘不廢吟咏一夕夢入  
帝閭闔門明旦無疾卒歸葬勸善鄉  
贈楊山居太史



曾裛荆璞詣天關。雨露恩深賜珮環。玉筍遙班躋鳳沼。  
金閨通籍侍龍顏。尚書聽履星辰上。太史蜚聲翰墨間。  
猷值承明耽隱興。錦袍光彩照湖山。

送俞子俊麗水巡檢

為官當作執金吾。膝上須橫丈二笏。會見黑頭驚獬豸。  
試看赤手縛於菟。醉歌擊碎玉如意。行獵射空金僕姑。  
眼底狂麕俱掃迹。胸中有策致唐虞。

弁山小隱黃玠

玠字伯成金華人。少見知於趙孟頫。黃潛有詩名。  
元季客於顧玉山。隨父正孫移家嘉興魏塘。後析嘉善  
釋雪廬有訓伯成絕句云。詩成嘗共野夫題。新構

茅堂水郭西。是也。平生慕郭林宗陶淵明之風。不  
喜儲蓄。有輒貸人。晚值兵亂。益貧困。後樂吳興山  
水之勝。卜築弁山。號弁山小隱。父死。仍歸魏塘。葬  
於陸莊。

碧瀾妾歌

切切重切切。女蘿附木風吹折。中情繚繞了弗離。聽我  
長歌碧瀾妾。碧瀾亦是諸王孫。世殊事異老且貧。少陵  
尚惜為奴者。况是當時真貴人。春衣典盡春寒悄。二妾  
朱顏正姝好。忍將羅帶折同心。懊恨浮生頭白早。珠鈿  
翠鬢幸僅存。此時猶及嫁夫君。十二樓頭燕子去。揮手  
不可畱。仙裾去妾相悲兩。相約既去猶煩送。肴酌主君



詎忍覆棄之見此反令心緒惡一心事天天亦知忍著  
主衣還事誰遂移衾襪與俱返後君死者當爲尼碧瀾  
堂下雙溪水使客往來豈知此不願新恩戀舊恩千萬  
人中兩人耳

題郭天錫画卷

門外馬蹄三尺塵屋底青山看白雲不知身世在城市  
但覺爽氣吹冠巾鴨嘴灘頭露沙渚彷彿西陵與漁浦  
惱人歸興滿江東烟樹半沉天欲雨

題顧仲瑛書画舫

扣舷擊節起歌鳴一榻橫舟小結廬篆籀古文三代上  
丹青妙手六朝初虹光貫月夜將半江影涵秋涼有餘

零落宣和舊時譜無情汴水正愁予

柳塘春爲顧仲瑛賦

江南二月柳條青柳下陂塘取次行蘭杜吹香魚隊樂  
草莎成蜀馬蹄輕小蠻多恨身今老張緒少年春有情  
得似東吳顧文學風前雨後聽鶯聲

俞子照漁溪隱居

遠結郊居帶水流滿川雲日弄漁舟魴魚何事歌頰尾  
鷗鳥多情笑白頭拔足風塵雙蠟屐全身天地一羊裘  
武陵亦是人間世只見桃花不見愁

湖光山色樓

山色湖光樓上頭闌干十二古今秋一川碧浪與天遠



滿地白雲如水流往事但聞吳苑在幽人多愛習池遊  
長年風景尋常好日日芳筵爛不收

釣月軒

牀頭書簾似芙蓉漁父滄浪寄此生臨水卜居聊遠俗  
垂竿欲下已忘情斯時我自知魚樂今夜誰同看月明  
千古羊裘一男子不貪祿位得真名

與賀九成知事

風流江左人何似猶有清狂賀季真早乞鑑湖爲道士  
肯呼太白作仙人珠簾遠對鷗邊雨玉麈高吟馬上春  
最想若耶溪水綠幾時同戴小烏巾

山居迴文

萋萋草帶書窗碧瘦竹輕藤引客看栖雀伴霞歸岫晚  
斷雲拖雨過江寒畦分暗水池亭小石帶幽花野館殘  
西掩松林通境窈共君邀月對琴彈

彥明王先生爲予言瞿慧夫且出示張伯雨李五  
峰所贈言爲賦此詩

聞說瞿文學與交皆偉人曹劉不可作張李故相親已  
蛻塵中鞅猶存席上珍才名元振厲詩語特清真顧我  
生何晚思君妙絕倫平生五經笥他日半通綸小試衣  
冠掾終期科第臣芝蘭居輒化薑桂久逾辛孟浩吟祇  
苦虞翻相本屯風雲同律呂時序異參辰有恨月初夕  
無言艸自春能忘正云晤搔首暮江津



四時詞二首

酒醒簾外日三竿陌上晴泥苦未乾人在花溪聞笑語

黃金小碾試龍團 右春

水碧湘筠浪織成粉藍輕縠小帷屏侍兒生怪風吹夢

故傍牀頭落剪聲 右夏

梅花

夢散羅浮清夜長銀絲挂燭雪生香人間那得量珠斛

合與東風聘海棠

黃秀才魯德

魯德嘉興魏塘人 後析嘉善 元末老儒有詩才邑景多

其題咏善鍼灸無嗣門人徐中得其學雲間邵復

孺有簡黃魯德秀才詩云洛下衣冠遠莫追城南

韋杜本同時江山風景今何似湖海襟懷自有期

近况俱題鸚鵡賦舊情猶托杜鵑詩蘭舟夢遶清

溪曲杜若花開白晝遲

亂後經瓶山 考見題咏

東西十里一廛無三五行人只露居惟有瓶山銀杏樹

至今猶發斧斤餘

武塘十詠

景德泉

幽瀾遠引曹溪水此是人間第幾泉一吸清涼除熱惱

不妨頻候煮茶烟



大勝塔

高標千尺插晴空俯仰人寰一氣中終日無風鈴自語  
不知火起梵王宮

附考寺在嘉善治東唐天寶建寺前有橋曰大勝橋

慈雲寺

唐朝古寺已千年金虜來時火燼燃殿閣尚存遺跡在  
何期一夜逐風烟

附考在嘉善治北三國時建唐名保安院

胥山

百里平田擁翠堆山人傳是伍胥來劍痕猶帶英雄氣  
白日雲淡鎖綠苔

鳳凰墩

荒丘空得鳳皇名歲歲春來宿草青雨洗燒痕含殺氣  
簫韶九奏想虞廷

附考在嘉善治東永安鄉菖蒲涇

陳賢良墓

河水東流繞九墩至今不解識真墳白牛曾踏風涇路  
故老時時說隱君

附考墓在嘉善縣東南七里

吳氏義塾

兒童父老尚絃歌共感吳門惠澤多今日文風俱掃地  
盡拋禮樂事干戈



附考在嘉善元吳森捐田二頃建義  
塾至大中廉訪使以聞表曰義士

### 慶山花園

削除荆棘創高臺萬紫千紅二月開日日笙歌樓上醉  
不知寒雨鎖荒苔

附考在嘉善元萬戶陳景純關內有慶山亭雪  
月樓置書画玩器亭榭七十二以延四方之士

### 吳瑩竹莊

千尺高榆繞竹莊清風亭上蕩花香如何一旦遭兵燹  
荒草寒烟怨夕陽

附考莊在嘉善城內  
元吳瓘所闢名竹莊

### 吳仲圭墓

老子平生學薊丘晚年筆法似湖州画圖自寫梅花號

### 荒草空存土一抔

附考墓在嘉善城內花  
園街之右有橡林今廢

### 蔡景傳

鐵網珊瑚清河書画舫二書俱有元人嘉興蔡景  
傳詩

### 題袁安臥雪圖

陰風響枯梢凍雪埋老屋淡逕斷行踪除道乏童僕閉  
門事高枕政爾清寐熟誰與排戶入停馬駐車軸問知  
是令君冷語無款曲卿去我欲眠毋煩責空谷升車首  
重回欲餉不敢賣移書舉孝廉庶以激頽俗後來立朝  
端諤諤爭楚獄方其高臥時何意萬鍾祿令君非素交



此舉真巨目范史良包羞姓名忘紀錄邵公有裔孫眉  
宇清可掬茗仙贈此圖筆駛意自足老氣近古作冷光  
淡朝旭當以淨眼觀那許汗手觸平生冰雪心展玩亦  
三沐

題趙子固墨蘭

靈均楚同姓子固宋宗臣秋色淒九畹墨香垂百春蕭  
閒入神品爛熳見天真此趣誰能會烟霞物外人

張顥

顥詩亦見鐵網珊瑚

題梅道人画墨菜圖

只宜滋淡泊安足奉膏粱食肉非無辱何如此味長

沈進士庭珪

庭珪字德璋鐵網珊瑚載破窗圖詩有庭珪一作  
後見吾邑陸芝房記元登科者沈庭珪係至正十  
三年舉人二十三年進士志俱失載

題破窗風雨圖

劉君性嗜學孜孜事三餘孤燈破窗下簡編自卷舒蕭  
蕭風雨來吾伊聲自如安貧人所難味道心常愉我聞  
顏子淵簞瓢陋巷居千載稱亞聖聲價重璠璣又聞陶  
淵明所處亦敝廬蕭然環堵間左右唯圖書吁嗟世之  
人性樂耳目娛華居美飲食所務安其軀良心日以斲  
疇能返厥初勗哉劉孝廉聖賢以爲徒



玉山主人顧瑛

瑛字仲瑛，別名阿瑛，自稱金粟道人。崑山人。元季辟會稽教諭，不就。築室茜涇，曰玉山佳處。園池聲妓之盛，甲於一時。招致海內名士，置酒賦詩。張士誠入吳，遂遜跡隱嘉興之合溪。營別業居之。釋來復，有寄題合溪別業次韻詩云：草堂合溪上，雲石靜無氛。春水鱸三尺，秋風雀一群。行厨依竹見，吹笛隔花聞。寂喜逃禪好，蒲團擬共分。不食諸侯祿，閒居避俗氛。岼花紅作陣，沙鳥白為群。貝葉風前讀，菱歌月下聞。清遊難再得，愁絕一江分。陳基有寄仲瑛寓嘉興詩云：每憶吳門顧辟疆，舊開池館

帶滄浪。綠波芳草盟鷗鷺，錦瑟玉笙悲鳳皇。座客詩成誰最好，故人酒後我多狂。扁舟獨往鴛湖上，老到猶能賦艸堂。瑛以子元臣封錢塘縣男。明洪武元年，徙臨濠。卒，自為壙志，戒其子以紵衣桐冒，機鞋布襪，纏裹入土。歸葬綽墩。按瑛所著詩曰：玉山璞稿，又輯交遊諸公詩四十家，曰草堂雅集。有萃亭館題詠曰：玉山名勝集。外又有玉山紀遊集。在合溪有暮雲集。今多遺軼。

玉山中亭館折毀殆盡，僅畱一草堂耳。今於嘉興合溪營一別業，頗幽寂。因賦五言一首。

我愛新居好，蕭然絕世氛。路回青草岸，水合白鵝群。野



色排簷入書聲隔竹聞是中多野趣難許俗人分

夜宿三塔次陳元朗韵

水落南湖不露沙又牽舫子到僧家春浮大斗娟娟酒  
寒隔虛櫺薄薄紗半夜檐鈴傳梵語一林江月照梅花  
坐來詩句生枯吻指點銀瓶索煮茶

次韻劉孝章治中邀夏仲信郎中遊永安湖二首

考見  
題咏

金粟寺中公解靜白晝事閒如治蒲沙棠爲舟穩可泛  
郎官之湖今豈無啄花鶯坐水楊柳雪藕人歌山鷓鴣  
日西上馬踏歸路小隊高呵驚道吾

湖上筵開張水戲掩幔涼風吹短蒲大魚聽樂浪頭出

小艇賣花城內無丙鼎庚庚識饕餮甲煎斑斑炙鷓鴣  
酒酣賦詩動海內親紙楷書能寄吾

次蒲菴長老三首

鴛鴦湖上住三年每憶僧中有皎然路遠夢憑蝴蝶去  
江空信斷鯉魚傳問人盡說山藏寺卓錫應知地湧泉  
未得青鞵滄海上燒香來看散花筵

無官身似一絲輕閒却胸中十萬兵爲夢淵明能入社  
獨憐靈運不逃名敲門看竹題詩遍煮石煎茶汲水清  
廷尉雀羅今可設死生誰復見交情

神山處處產神芝獨有神仙不可期賈誼過秦曾著論  
息躬絕命亦摛詞千秋離合雌雄劍一著輸贏黑白棋



多少英雄皆鬼錄天年全付病支離

乙未和孟天暉

婁上人家不識春檐頭蛛網亦生塵朱門桃李皆零落  
只有東風未嫁人

題趙子昂畫楚江春曉

東方旭日出曛曛照見巴江曲似弓莫遣猿聲到巫峽  
山頭猶有楚王宮

捕魚圖

磯頭新水三尺增漁翁兩船攀一罾大魚跳波撥刺去  
只隔蘆花喚不應

西溪先生鮑恂

恂字仲孚崇德人元統間三領浙元歷平江教授  
至正甲申至元癸巳皆入闈校士學士張翥御史  
劉彥博薦入翰林不就嘗居千金梧桐二鄉後復  
卜居郡之西溪耕桑自樂自號環中老人迨明洪  
武初禮部主事劉庸舉吉安余銓高郵張長年及  
恂皆明經老儒達於治體可備顧問遣使召至京  
時年八十餘上見之大悅命爲文華殿大學士以  
老疾辭諭曰朕以卿年高德劭故授此職煩輔導  
東宮耳免卿早朝日晏而入不爾當從卿志恂復  
固辭遂賜勅放還與貝清江程柳莊結社講道學  
者稱西溪先生恂爲人慎重不可狎而學行名天



下少嘗受易于臨川吳草廬著大易傳義詩文有  
西溪漫稿

龍眼池考見題咏

寶地多奇跡雙池鑿龍眼秋水涵遠空寒波應靈響陰  
雲翳或結夜月晴夏朗對此長湛然虚心自蕭爽

題吳仲圭平遠圖

蒼山遙遙幾千里綠樹參差碧烟起雙帆忽從江上歸  
影落斜陽溼秋水林陰蒼莽鳥不飛石徑躑躅行人稀  
松根似可縛茆屋沙尾亦足容漁磯我曾西遊倚江閣  
極目長空入寥廓好山不肯過江來恨不乘風跨黃鶴  
吳君画手當代無落筆何年成此圖安能著我巖壑底

相覓老樵尋釣徒

次韻贈李煥章

輟棹清谿曲題詩画閣幽晴雲松上過暗水竹間流把  
劍時驚鶴持杯不連鷗出門塵滿眼於此且淹留

次竹林先生中秋玩月作三首

昔年為作蟾宮客曾向宮中看月輪萬丈光縣金粟樹  
三更影落絳河津生憎老兔浚為窟却笑仙娥不嫁人  
回首歸來舊塵世滿天風露一吟身

數年不對中秋月月色依然不負秋嬾問仙人修玉樹  
且陪帝子上瓊樓斗牛低繞天樞轉河漢斜橫左界流  
却望蓬萊宮闕遠幾隨清影重回頭



浪說今宵明月好干戈滿地幾人看唯餘院落清尊賞  
忍照沙場白骨寒采筆寫殘思縛兔玉笙吹罷擬乘鸞  
知君此會非忘世只爲良辰一笑難

除夕

絳蠟高燒爆竹鳴群兒奔走喜還驚老夫識得春來慣  
自伴梅花睡到明

趙彥微畫二首

管在茗花谿上住繞溪山色滿高樓別來十載看圖畫  
山自青青我白頭

吳興孫子多才俊曾把文章動九關歸到江南塵滿眼  
忍將情思寫青山

盛叔章畫

煙溼空林翠靄飄渚花汀艸共蕭蕭仙家應在雲溪處  
只許人來到石橋

王綸

綸字爵無攷鐵網珊瑚有嘉興王綸題梅道人畫  
菜一絕郡志載其桺橋漁唱詩而景德倡和綸亦  
與焉固當時一詩人也

水溪歎

至正十年夏四月戊戌吉皇帝詔四方夙夜靡暇逸興  
利與除害守令宜休休江南水溪蕩租稅無所出官府  
議除豁生民務存恤松江素汙下川陌流汨汨惜哉郡



太守民情固沉匿茫茫修竹鄉卑溼難具述只如來字  
圍積滂恒數尺歸附八十年未始睹穎粟胡為吝一言  
歲糜六百石省憲雖至明蔽隱不容詰嗚呼皇天后土  
皆白日何獨使我寘此幽暗室有食不令充我飢有藥  
那得療我疾皂胥自此從隳突妻子何時免啾唧繫太  
守兮民之父母盍自省兮爾俸爾秩縱然民命不爾憂  
奚爲王言棄如嫉九重閭闔雖深密民瘼民寃極纖悉  
爾居郡縣親目擊忍聽咨嗟起蓬蓽巨泐崩隄滙爲一  
雨不崇朝先汎溢荒蒲衰葦風瑟瑟爾亦何難究其寔  
培民聚歛非仁術財聚民離果誰失欺君不容誅戕民  
有常律我民一何苦爾見一何執君恩寬厚難再得再

拜仰天長太息

柳橋漁唱二首

考見  
題咏

楊柳青白鷗不來烟水昏落日乘風放船去顛倒醉眼  
包乾坤君不聞西家急科糴東家重築城越上良田無  
主尋我漁歌發兮君爾聽黃金何似一絲輕  
楊柳黃秋風一夜蘆花鄉漁釣靜忘周日月公卿不換  
漢桐江君不聞大官呼領兵小官亦戎行天涯歲月多  
風霜我漁載歌兮情慨慷鑑湖容借賀生狂

常山長真

真字爵無考徐一夔於洪武十二年有祭宣公書  
院山長常先生文詩見至正倡和集又於金蘭集



中得七律一首題曰南宮常真

題徐良夫遂幽軒

萬山淡處着柴門窗下流泉屋後邨  
祇藉耕漁資活計不縈聲利競晨昏  
松陰鬱翠林藏雨桂子飛香月滿軒  
世事無勞相問及嗟餘還共倒芳樽

周山長致堯

致堯字煥文初名棊先世來自四明  
居崇德州石門鎮致堯生極穎異  
讀書一二過不遺嘗爲宣公書院山長  
明洪武初與薦辟不就歸隱梨林著有  
石門集淮海秦約序之稱其詩不事雕飾  
特以雅致爲佳云

迷衷

平居遠塵市畏觸憂患端矧茲值多故而敢衷自安寄  
身途旅中戚戚苦飢寒爲生耻無庸緝遺守微官雖云  
匪多秩所職期可觀顧非周圓器執事仍獨難蹇予亦  
何爲俛仰徒長嘆

脩稷日偕曹廣文七人遊南湖賦得裴休舊業休  
字公美捨宅爲寺今真如寺是也

幽賞殊未窮揚舲濟南湖載瞻裴公宇蕭條乃禪居緬  
思太和季秩班百僚初晚懷超俗緣息心究空虛歲月  
既云邁世事亦已徂我我清暉堂遺構委榛蕪斯人不  
可作慨傷獨在予



甲辰九日東塢登高分得竝字

東往有高塢名與福城竝九日陪諸賢登臨期絕頂秋  
深木葉落不覺天地迥涼颺灑林霏咫尺衣裳冷玉田  
好開懷何止供香茗幽軒賞佳菊竟夕忘酩酊管人晝  
遊此衣錦寧尚聚寥寥千載間視若空華等清境素情  
愜塵心未全屏感彼興我懷鈞詩記浚省

夏夜宿流虹寺有感

馳驚竟朝莫侶緣飢凍迫如何百年間區區爲形役世  
途寡相知覩顏徒自飾所獲既非寶所喪良可惜生理  
固艸艸進退量我力豈乏希世榮肯車已當阨流光急  
奔馬素業紛斷織大道卒未聞怛焉增內惕

附考寺在府治東北二百步宋孝宗生于承廳後  
改爲興聖寺御書流虹聖地今廢爲嘉興縣學

雨夜感懷二首

臥聞窗間雨瀟颯夜將淡轉對壁上燈依微照孤衾撫  
茲淒絕候况感遲暮心早起視明鏡白髮應滿簪  
攬衣起中夜感嘆成嘯歌百年事形骸所得良不多生  
理既茫昧動靜虞網羅歸哉南山陲石田蔭松柯

題俞仲剛山水

我筇四明尋隱者著屐遠過玉几山巖扉苔徑轉森邃  
結窩乃在雲松間松間迴風蕩空影水流花開春日永  
苧服涼淡團扇開好鳥飛來意俱靜爲覓漁梁白沙出  
因識樵人奕棋處扁舟暝泊碧溪陰沿月長歌下山去



東帶十年事朝謁  
雀怨猿驚總淒切  
草堂晴晝玩新圖  
三嘆令人愁欲絕

西谿訪鮑先生

谿上齋居好幽偏  
事不侵桑麻存晚計  
圖史樂初心岸  
幘幽窗晚移牀  
綠樹陰卜隣  
何待老從此  
數相尋

送崇德州夏同知

忼慨持征節  
雄談思戰塵  
有生皆帝力  
無地不王臣  
爲國丹心在  
論功白髮新  
他年忠義傳  
端合繼南人

次石監征韻

憶子臨東海  
征帆幾日回  
鼉鳴津鼓合  
蜃起石樓開  
官酒應深酌  
春衣或未裁  
題詩記遊歷  
時寄到蓬萊

寄道士胡尚惠

綠草丰茸碧樹斜  
清涼琳館即僊家  
養生不餌千金藥  
對客時分五色衣  
池上雨來飛赤鯉  
林間月出見金蛛  
顧予顏色渾如雪  
曾記松西汲井花

寄沂陽劉廷鎮員外

故人相與最從容  
尚憶論詩向夜中  
白首無家十季別  
青山何處一尊同  
夢回孤館鐙前雨  
目斷西風塞外鴻  
誰識離懷愁絕處  
野亭依舊穆陵東

吳中

兩岸春雲暗柳條  
滿篷風雨過楓橋  
空憐越絕溪山好  
且聽吳趨巷陌遙  
官舍晚涼飛燕子  
水鄉人靜賣魚苗



誰家白晳佳公子賸把黃金買阿嬌

登崇德州城有感

溪上孤城百雉餘城門猶自護儲胥  
灞陵空宿將軍騎范叔應隨使者車  
雞犬蕭條兵過後漁樵散漫市休初  
老年觸事多成感閒向芭蕉葉上書

寄舍弟鼎

生計依人轉寂寥別來心事向誰消  
鏡中華髮隨年改谿上青山入夢遙  
對酒僂思歸白社將書不敢寄洪喬  
越情吳思渾無賴獨倚江樓送暮潮

臨平道中寄京師諸友

雲外羣山縮翠螺馬蹄長是客中過  
關河樹色秋先近

驛路蟬聲晚夏多千古心期空皓首  
百年人事等滄波自慙薄劣頻趨走  
幾度因風想玉珂

春日雨中漫成次顧玉山韵兼簡石監征仲德

十日春泥懶入城滿湖風雨未開晴  
草堂欲補寧忘陋沙鳥頻來莫漫驚  
橋外柳條隨意綠坐間苔色傍人生  
緣知花事渾能幾好買芳尊對客傾

寄劉孝章經歷

意氣傾人記昔年東風飛蓋日翩翩  
花明古戍春停騎月上清江夜放船  
老公安交遊誰更健亂來踪跡摠堪憐  
山光水色渾無賴却數冥鴻野外天

次韻送陳壽夫之湖州



識君雖早送君遲却愧相看在亂離十口一家無別業  
此身何日是閒時青山滿路春船酒白日空江客枕詩  
我有好懷誰得共鷗波千頃雨絲絲

蔣氏小瀛洲 并引

漁石先生營室雲塘之間水竹蒼翳幽偏絕塵讀書  
養道致足樂也楊鐵史顏之曰小瀛洲至正壬寅秋  
七月予曾一至其處迄今九年所矣適晤其令子文  
質知先生無恙爲賦一首奉呈

茫茫人海小瀛洲靈艸丰茸碧樹幽底用風輪通弱水  
時逢雲袂下浮丘天陰圖畫龍鱗溼月夜吹簫窸背秋  
我亦平生有仙骨歸來同作采真遊

寄吳興張別駕

鴛央飛去潦波平曾聽驪歌憶送行南浦移舟官樹綠  
野亭酌酒晚風晴異鄉春近多新夢遠使書回足舊情  
欲識懷君無限意滿庭芳樹亂嘯鶯

西津夜泊

孤帆夜落石橋西橋外青山入會稽臥聽海潮吹地轉  
起看江月向人低一春衰謝憐皮骨萬國艱虞厭鼓鼙  
何處客船歌水調令人歸思益悽迷

次韻顧玉山寄張子潤

險宦何殊闕九淵且將蕭散事餘年風前白苧裁春服  
花外青藜挂酒錢聖世敢云輕紱冕野人端合老林泉



養生况有封囊藥坐聽流鶯手自圓

次韻顧玉山見寄

郭外茅堂隱者居竹寒沙碧映窗虛畚田黍熟盈尊酒  
溪女船回滿七魚別業定行中使画佳兒亦拜撫軍除  
百年人世多馳逐玉麈清風獨晏如

春日偕玉山泛舟平家湖訪石仲德次韻

湖上春光生綠波湖頭柳色似新鵝已知出郭塵喧少  
夏喜臨流樂事多穩坐蘭舟勝上馬新裁苧服不須羅  
茆堂只隔東西瀼隨意相從載酒過

謝劉經歷惠曆

鳳曆新頒自九天故人相寄感相憐極知帝德符三統

共喜春王正八埏海舶遠歸占上日野夫多病惜流年  
老妻不解歸來意數問臨官在幾篇

琦元璞所藏趙子昂馬圖

進馭歸來日未西落花芳草滿春泥也知櫪上無凡馬  
牽過天閑不肯嘶

苧邨

鳧雁人家春水多淡煙疎雨暗漁蓑分明記得南塘路  
船尾吹來白苧歌

附考嘉興城南一里有白苧鄉

卓教授成大

成大字器之其先閩人知平江吳縣值宋亡遂留



居嘉興之甌溪後浙嘉善迨成大四世矣。至正中為府學教授。嘗創荔軒以寓思鄉之意。徐一夔為記而傳之。

荔軒

進不得看長安花。退不得攀家山。荔先人之言何其悲。援筆聊題此軒記。

鮮于典簿樞

樞字伯機。漁陽人。中歲始刻苦讀書。因號困學。遂善詞翰。工行草。虞集云。漁陽吳興。巴西翰墨擅一代。謂樞與趙孟頫、鄧文原也。樞嘗于廢圃中得恠松一株。移植之。呼為支離叟。朝夕撫翫。溫日觀至。

其家醉即抱之。或歌或泣。又嘗愛一蠻獅。冰滴乃漢物也。偶墜。其吸子於西湖水閣。百計求之不得。既他往。三年復來。忽獲于水中。以為神。一時詩人多咏其事。時浙省廣濟庫歲以富戶司出納。侵用官資者。府判王某輒拘其妻女。以小舟載之西湖。趣逐遊人。收其姦錢納官。樞因作湖邊曲云。湖邊蕩漿誰家女。綠慘紅愁羞不語。低回忍淚傍郎船。貪得金錢強歌舞。玉壺美酒不消憂。魚腹熊蹯棄如土。陽臺夢短去匆匆。鴛鴦生寒愁日暮。安得義士擲千金。坐令桑濮歌行路。予閱顧玉山草堂集。秋華亭扁聯。係樞所書。自署樞李。當亦流寓吾禾。



故爲入之

感寓

春風吹綠波淡蕩洛陽柳高樓語錦瑟落花泛樽酒何  
人白鼻駟蒙茸紫貂袖一字或未識銀章懸兩肘煌煌  
貝宮珠迺落絡蕭手誰知艸玄者窮巷閉白首

退宮人引

駝絨繡帽紅顴頰素髮微連細紗結出宮嫁作海商妻  
褰腰尚帶河西摺少年十五二十時中官教得行步齊  
春羅夜翦綉花帖堦前夜舞高夔麗寵姬當前翠衿小  
僂覺中原美人少金蓮斜抱捧珠龍玉籠倒挂收香鳥  
年年宮中春日長小車銀甕蒲萄香香殿吹簫鳳皇語

一日再宴諸侯王舞困樓蘭過三十內家別選蛾眉入  
雖名伴送半無家旋賣珠環問親戚一爲商婦始自憐  
十年不見回番船年多不記教坊曲時時尋撥相思絃  
遊智者寺

四圍松是祇園樹三面山開舍衛城遊子心隨仙境化  
老禪詩似石根清幾人邂逅有今日半載趙趙成此行  
安得盡拋身外事長年來此學無生

靜慧寺四首

寂寂僧房半夢中蕭蕭脩竹四山風惟應門外蒼髯叟  
解亂儋州秃鬢翁

晚雨纔收日已西石梁沙路淨無泥清泉灑灑千峰迥



綠柳陰陰一鳥嘯

壞壁蒼蒼上綠苔  
籠沙無復護塵埃  
只應枉駕遊山處  
總爲坡仙寶墨來

學道當知髓與皮  
聖門壺奧要探窺  
十年來往臨平道  
爭信山中有許竒

戲題廣嚴僧房壁

幾年門外策征騃  
不料能來共一龕  
壁上未須書歲月  
褚河南是護伽藍

薛相士如鑑

如鑑嘉興永安鄉人  
後析挾相術游江湖一時名士  
嘉善  
多與交往楊廉夫有詩贈之曰  
銅之鑑僅以見妍

媿不若書之鑑可以見是非  
又不若人之爲鑑可以見善惡之端  
禍福之機  
河東薛相士自稱老鑑師  
一雙神瞳秋水碧  
三寸長舌霹靂飛  
曾相水邊遺髮作貴子  
道上擔丁爲富兒  
前年山東睡漢是龍虎  
今年雁山處士非熊羆  
談言一一中予奪無依違  
見子勸以孝見父勸以慈  
見臣勸以忠藻鑑道如此  
頗近古教規  
鐵笛道人學讀書與詩  
誤蒙進士賜緋衣  
龍門上客一日速  
十年不調官何遲  
吳門相見談出處  
許我再覲黃金墀  
我心自鑑復自斷  
子卿唐舉無容知  
醉來吹笛客且去  
天青月在梨花枝  
子月鑑孫鑑心白雲秋蟾皆能世其術



廉夫又有秀州相士歌叙曰秀州相士薛氏見心者拜予湖上手出句曲外史自贊一首及縹冊一帖且傳其言云持此以見梅花道人道人技養當爲汝歌歌訖然後乞其竒文章余爲噓然大笑既爲賦歌詩一解又如其意書梅花道人傳一通俾東歸以復外史其詩曰秀州相士薛見心重湖風雨來相見手把茅山道士詩亦有胡僧寫東絹自云膝不拜公卿海內名人初入卷縹綾方冊錦盤囊首錄梅花道人傳道人不讀姑布書兩目看天走青電梅花忽露太極心南枝北枝開一遍秀州相士亦識道一笑求心符鐵券章生不相一隻眼

桑生不相一尺面貌如削瓜帝治開背如植鱗王業建君不見漢家將軍如牯腰午夜臍燈照悲喧又高啟亦有至正辛丑嘉禾相士薛月鑑過余求詩因贈云我少喜功名輕事勇且狂顧影每自竒磊落七尺長要將二三策爲君致時康公卿可俯拾豈數尚書郎回頭幾何年突兀漸老蒼始圖竟無成艱險嗟備嘗歸來省昨非我耕婦自桑擊木野田間高歌誦虞唐薛生遠拏舟訪我南渚旁自言解相人視子難久藏腦後骨已隆眉間氣初黃我起前謝生弛弓嬾復張請看近時人躍馬富貴場非才冒權寵須臾竟披猖鼎食復鼎烹主父世



共傷安居保常分。爲計豈不良。願生無多言。妄念  
吾已忘。

奉訓句曲外史

繡簇花攢百幅新。故應重喚謫仙人。靈臺一霎交梨熟。  
漫向峰頭拜七真。

濮隱士允中

允中字樂閒。崇德梧桐鄉人。濮氏自著作郎雲翔。  
從宋南渡。占籍于此。遂名濮院。元大德中有濮鑑。  
字明之。封寧遠將軍。允中豐於資。嘗以中統鈔一  
千錠買歌兒汪佛奴。姿色秀麗。一日飲桂花下。佛  
奴奉觴。允中曰。我非久人世者。汝將奈何。佛奴垂

泣。誓無二志。允中死。佛奴獨居尼寺。潔身以終。事  
見輟耕錄。元末浙西歲有詩社。允中集一時名士。  
吳毅輩爲叢桂文會。以文卷赴者五百餘人。延楊  
鐵崖。江朝宗。讀書桐香室。埋名不出。時貝瓊結屋  
爰山。鮑恂居郡城之西溪。四方避地者。温州陳秀  
民居竹隣巷。閩人卓成大居篋川。江陰孫作居南  
湖。崑山顧德輝居合溪。天台徐一夔居春波門外。  
河南高巽志。江都丘民。錢塘陳世昌。皆來僑居。四  
明周斐以宣公書院山長。畱居梨林。日以文酒倡  
酬山水間。傳爲勝事云。

自題桐香室



研經暇即課子掃榻倦亦畱賓莫嘆秋風蕭颯穿林月  
片如銀

沈元啟

辛未年予在京師朱檢討於真蹟中得元人樵李  
沈元啟題画一詩因錄於此

題錢舜舉桃源隱居圖

青山何處桃花邨白雲如龍繞山根眼中茅屋參差起  
若此境趣皆桃源桃源只在人間世流水無情遠朝市  
重山遮不斷春風萬樹桃花雜雲氣溪上高軒絕瀟灑  
人物衣冠猶大雅水行有船陸有馬吾將往問種桃者  
沈南疑先生樵李詩繫第五卷終

沈南疑先生樵李詩繫第六卷目次

平湖 金 南鏜 夏聲 校閱

元

江翰林漢二首 高太常巽志二十五首

牛尚書諒九首 陳博士世昌三首

張學訓翼六首 徐教授一夔六首

丘侍郎民四首 孫司業作十五首

丹崖居士唐肅九首 沈知縣鉉二首

陳銘四首 王峪一首

高尚志一首

至正庚辛唱和二十八人



繆同知思恭一首

高巽志一首

徐一夔一首

姚教授桐壽一首

釋克新一首

江漢一首

陳世昌一首

鮑恂一首

樂架閣善一首

金太守綱一首

潘府史澤民一首

殷統軍從先一首

朱處士德輝一首

郁右丞遵一首

呂安坦一首

鮑恂一首

牛諒一首

釋智寬一首

常真一首

丘民一首

張翼一首

王綸一首

來志道一首

聞人麟一首

曹廣文睿一首

徐一夔一首

尤存一首

周棐一首

沈南疑先生樵李詩繫第六卷目次終



沈南疑先生攜李詩繫第六卷

元

江翰林漢

漢字朝宗會稽人。元季客吳中。落魄而返。經崇德。濮氏延為上客。明洪武初。以文學徵。授翰林編修。應制賦。元日早朝詩稱旨。賜緋袍。請老歸。遂家濮院。今析桐鄉與親知遊。宴嘗着賜袍。有月夜清遊歌。以下十人俱仕於明。因元季流寓。竝列卷末。

題破窗風雨圖

君有客兮青雲衣。珮玉玦兮光陸離。爰處兮爰居。左琴

平湖 金 南鏜 夏聲 校閱



劍兮右圖書客心兮孔塵聲吾伊兮夜達晨輕富貴兮  
浮雲保厥美兮天真山房兮寥落秋清兮氣薄天冥冥  
兮雲漠漠雨瀟瀟兮風夜作心耿耿兮不寐嗟斯時兮  
落魄滴曉露兮寒窗紛遑遑兮求索彼僕夫兮貪婪唯  
聲色兮是耽文繡兮膏梁蓀芷兮懷慚秋蘭兮青青我  
所思兮古人雪案兮寒檠甘與君兮相親

濮川月夜清遊歌

考見  
題咏

有客來扣門邀我清夜遊夜長苦不寐夜遊慰淹留於  
時仲冬十五夜小星嘒嘒奎與婁乾坤上下絕塵滓團  
圓月色如中秋恰如銀盤出東海照我毛髮寒颼颼此  
時清興發與客相綢繆即從西街入便至西河頭行行

渡溪曲石梁跨清流魚鱗萬屋侶城市市廛行盡皆田  
疇我行興已盡客指歸路休歸去語妻子此時足清幽  
不知百齡內夜夜得此不生平不作不平事遊時不覺  
心優游

高太常異志

異志一作遜志字士敏號嗇庵河南人元末僑居  
郡中嘗受業于宣城貢師恭鄱陽周伯琦遂昌鄭  
元祐為文澁純典雅成一家言以薦為鄖山書院  
山長明洪武二年徵修元史入翰林累遷侍講學  
士未幾引退又召為試吏部侍郎以事去官謫居  
朐山建文間復召為太常少卿壬午靖難兵渡江



巽志遯去。入永嘉雁宕山。其門人文淵閣侍書蔣  
競亦潛踪於此。巽志病卒。競爲經紀後事。莖芙蓉  
峰北。或云先壬午而卒。與臨難自經者皆非。是卒  
謚文忠。蓋私謚也。其詩僅見樵李英華。而石倉詩  
選列朝詩集因之。予復採金蘭集中數作并入。後  
在京師。朱太史彝尊授予嗇庵集。又得其裔孫高  
佑鈺授予家傳。始獲其全。覽之詞旨幽邃。音節豪  
宕。亦詩家之表表者也。

荅徐以文

我本不羈士。少年知遠遊。結交盡豪俊。英風邈難儔。浩  
然志四海。壘斷非所求。群雄亂天紀。誓將除國讎。驅馬

向京邑。道路阻且修。曠望空嘆息。失計成淹留。時哉苟  
未會。白璧寧暗投。耻同五鼎食。笑視千金裘。素絲尚遊  
俠。枚臯事俳優。知己竟不遇。行藏誰與謀。白日如逝水。  
冉冉春復秋。人生久羈旅。豈不懷故丘。芳時倏徂謝。悲  
緒寒颼颼。容華易憔悴。安能常黑頭。放歌吳門市。洗耳  
長江流。雖然不得意。常爲蒼生憂。心隨去雁遠。目送孤  
雲愁。夫子東海裔。濟代多良籌。既無陳仲舉。雖賢罕見  
收。何如共脫屣。速駕赴滄洲。

有感

退之少苦貧。干祿頗浮躁。長安三獻書。時宰終不報。飢  
寒日哀鳴。踰壯已曠眊。向非董張徒。宦轍誰與導。少年



屢摧抑大器天所造苟不涉患難尤足長雄鷲嗟余樗  
散材時邁未聞道雖云寡知己敢忘固窮操狗利多乞  
墦賈名爭媚竈薄俗諒如斯何事傷懷抱

以少陵文章憎命達句爲韻賦五章

違世甘濩落撫已徒憂勤既通金閨籍方思策竒勲何  
爲竟鍛翮復與沮溺群念往每懲咎縱學求多聞朝飲  
西澗水暮宿東山雲境靜思疲蕭心清遺垢氛森然富  
藻思載道非空文尚賴特立操千載揚清芬

積雨滿污瀆蛭蝻聊自藏商飈振修簿篋露依崇岡動  
植各生遂伊人獨何傷謫居窮田野與世殊相忘緬懷  
昔憂患髮短心日長所願免飢渴孰敢謀稻梁戶庭罕

遊跡琅然誦文章歡來意自得遐想起黃唐從此遂閒  
逸投老終徜徉

鱣鯨擊洪濤一躍龍門登驚風落潮汐失勢投岡陵鬢  
鬢日已槁窮涸何由興翻爲獼獼笑敢望餘波騰畸人  
感物理冥思多所徵雲翔避矰弋淵潛避筍簞胡爲狗  
世務軼軻常兢兢勗哉保素履勿貽人所憎

荆璞不善藏輕售與時競雖無泣玉耻棄捐揜光瑩伊  
余昧先幾妄往成蹭蹬貪得違素心狗名忘積行通籍  
曾幾時三年絕朝請久睽徒侶歡轉失鄉黨敬剥喪非  
偶然且委時與命

功名期宦成文章止詞達千載求全能如何罕竒拔夙



抱稽古志纂言窮槩括幽闡天機深精思元化幹豈徒  
賁皇猷將以繼往轍于今不自足乃復耻被褐好爵難  
久縻世途多慘怛放意樂丘園長歌襟抱豁

甲辰九日東塔廣福寺登高同牛士良陳彥博徐  
大章周致堯釋元璞玉田用杜少陵玉山高竝  
兩峰寒爲韻分得兩字

浮圖鬱嵯峨遙睇青雲上踟茲城府中間歲不一往今  
夕復何夕謝此塵務鞅侵晨拉寓公登高叙幽賞涼風  
起天末林霏發清響檐霏瑣陰壑鐵馬精神爽穿彼游  
龍窟容與巨鰲顛徙倚珠貝闕捫摘璿璣象感此懷古  
人窮愁一條蕩嘉會難再期良辰應不兩上人知雅意

丈室豁宏敞沽酒采芳菊忘情非放曠群公中州士遭  
世何極罔辟地僑寓此辭氣俱慨慷王師何日下恢復  
舊輪廣仍趨清朝列脫卸江湖網贊理新治化日月增  
輝朗坐令瘡痍洗四海起瞻仰鈞詩寫房壁嶮題筆枯  
強他日重追遊於以動遐想

題茅山道士沈秋淵海鹽聽潮里小瀛洲錄呈畊  
漁隱人

我聞瀛洲在滄海此說相傳數千載一杯弱水不勝舟  
雲霧軒窗眇何在憶我初冠遊江東開帆直指三茅峰  
瓊樓玉殿倚天碧丹光飛射金芙蓉只今可望不可即  
跬步之間成異域坐令塵土凋朱顏墮落干戈空歎息



沈仙慕事三茅君曾開石壁觀瑤文晨朝環佩空外響  
琅玕杳杳雲中聞自從遭亂山林燬避世歸來聽潮里  
崇構崔嵬迥絕塵雲和草靜環流水瀛海遙連咫尺間  
三峰宛似三神山金雞呼日扶桑曉念爾孤宦應當還  
嗟予本是瀛洲客幾年欲歸歸未得羈棲且待靖風塵  
名山歷覽無南北

題江行初雪圖

宿雲黯慘埋巖壑疾風颯颯稍林薄孤舟擺浪何處來  
雪片縱橫向人落一翁蓑笠度危橋一翁荷擔轉山腰  
崖傾石凍竹偃僂不辭辛苦歸途遙君不見軟裘貂帽  
馳快馬遮莫冰花徧原野人生得意能幾何相逢俱是

窮途者

送孫照庵還吳

昔客吳門日於今四十年故居蕭寺外遺冢石湖邊結  
友唯高適論文憶魯連翁今重會面訪舊一悽然

次韻荅徐良夫

半生遭亂欲歸休塵事羈縻豈自由逸氣那堪操雁贄  
閒身端可被羊裘烟光樹色千山晚楓葉蘆花兩岬秋  
別後莫教音問少相期重泛木蘭舟

徐德厚司丞隱居

放棹南湖春水淡昔年遊覽得重尋陶公未許辭彭澤  
龐老那容隱漢陰落絮雨餘沾墨沼遊絲風暖冒書林



自憐久客渾無賴亦欲攜詩與盍簪

城南小隱爲松江郭彥禮賦

步屨幽尋古岬隈柴扉正對郭南開林間野逕穿雲入  
溪上春潮待雨來過客停杯歌白苧隣翁吹笛坐蒼苔  
羨渠高隱空相憶浪迹多年素髮催

贈章安甫老人

籃輿迢遞出郊坰野服翩然宦髮星柱史不辭周問禮  
伏生須爲漢傳經汀湖水落蒹葭老澤國霜寒橘柚青  
自笑隱淪緣底事時危踪跡一浮萍

簡蒲菴長老

論交猶憶自前朝亂後誰憐意氣銷元亮歸來依惠遠

少遊久客過參寥山房黍熟供蔬甲石鼎茶香薦菊苗  
名勝想無今古異禪龕容我避塵囂

送程彥明之松江

同是他鄉客俱爲避地人興來猶浪迹別去更沾巾山  
路常疑雨江花已報春荒烟投遠戍落日扣通津樵笠  
歸墟盡漁蓑渡水頻揚帆驚宿鳥鼓柁駭遊鱗俗薄誰  
知己時危不計貧飄然滄海上也欲共垂綸

鴛湖秋月

雙湖偃長虹月出微瀾靜鼓柁獨沿洄流光蕩空影

秀水飛帆

挂席曉烟收忽與天風遇誰唱秀州謠恐是南塘路



茗川夜宿

山繞荒城水自流  
霜空月色滿溪樓  
夜長歌枕渾無寐  
二十五聲都是愁

題雲林画

蒼然古木石巖幽  
移得江南一段秋  
共說倪君知籀法  
數竿瀟灑夏風流

陶潛明像

玉山頽矣葛巾偏  
老僕扶持步不前  
莫道先生渾不醒  
醉中猶記義熙年

贈相者薛電日

烟烟雙瞳巖下電  
秋風江海布帆寬  
如今亦有新豐客

旅次相逢莫易看

題盧元佑所藏江山圖

結茅曾住白雲間  
遊宦多年客未還  
開卷偶然鄉思動  
數峰渾似鄂州山

過海鹽二賢祠

思魯橋邊月較明  
二賢祠下水偏清  
如何水月無情物  
也重當年邑宰名

附考祠在海鹽縣南思魯橋之左祀宋縣令魯宗道柱上有聯云烏  
去古祠留鳥翼名從青史識魚頭後并入黃郎中主故名二賢祠

牛尚書諒

諒字士良山東東平州人元末寓居嘉興與鮑恂  
張翼諸名士友善學者多從之遊自顏其堂曰尚



友徐一夔爲記。明興應詔。除翰林院典簿。同學士張以寧使安南。御製歌詩賜之。歷陞禮部尚書。嘗與唐肅有。丁未九月聯句詩著述甚多。蓋明初才士也。

送陶九成東歸

大江秋漲滿。汙汙綠波注。送爾東歸人。愁懷渺烟樹。方謀耕釣隱。已遂滄洲趣。圭組尚予縈。京華獨淹駐。他日漫相思。離舟從此去。

甲辰九日東塔登高得玉字

挈舟出東城。秋高氣應肅。雖無龍山境。華林亦不俗。雙池水清白。于以濯纓足。飛觴坐苔石。寒泉薦幽菊。迺登

梁朝塔。觀海望天目。諸賢快先步。嗟予苦蹉跎。不及終雅興。徒倚闌干曲。分題寄遊勝。拋瓢引群玉。

秋林圖題贈曠伯達

回風蕭蕭吹北林。行雲冉冉生夕陰。天寒雁去洲渚淨。秋雨龍吟波浪深。飄泊共憐今日興。畫圖因見古人心。幾時螺子青楓下。淡結茅堂夏遠尋。

庚戌五月十三夜夢侍讀張先生枕上成詩

出使艱虞萬里同。歸期日日待秋風。寧知永訣蠻江上。纔得相逢客夢中。岼嶺尚看頭似雪。掀髯猶覺氣如虹。起來拭淚凭闌久。月落啼螿繞殯宮。

破窗風雨圖



風雨東南接漏天。客窗吹破碧紗烟。十年世事關心曲，一片秋聲到枕前。花落不妨尊有酒，客來未覺坐無氈。老子會覓蘓端隱，藜杖春泥綠水邊。

題画梅

梨花雲底路參差。折得春風玉一枝。南雪未消江月曉，欲從何處寄相思。

題惠麓秋社圖

澤國霜晴過雁天。翠微秋色淨無煙。歸來好記登臨處，首着盤香第二泉。

東吳棹歌二首

太湖茫茫水拍天。吳儂只慣夜行船。竹枝歌罷燈將滅，

風雨蕭蕭人未眠。

玻璃冷浸洞庭山。雪竹攢青竹柚斑。白髮吳娃笑相語，官船不似釣船閒。

陳博士世昌

世昌字彥博，號西湖真拙，錢塘人。力學古文，不慕祿仕。至正間，由布衣徵授翰林編修，奉勅代祀海上。值道梗，遂畱嘉興。作南湖賦，傳頌于時。授徒養母。張氏據吳，屢致不屈。明初徵修禮書，授太常博士。尋以母老辭。後徵至京，卒。有希言作希賢誤集。

憶別

予本念鄉井，風波忽已臨。翩翩一長別，慷慨增悲吟。况



當季秋月千里漫沉陰驚風振西郭繁霜飛北林羈情  
逐馬首哀思悽虫音小人誠有母主命恐難任珪紐詎  
匪榮喜懼鑄我心當年惜形影此日悲商參不用淡追  
昔還須重念今

甲辰九日登高東塏分得山字

登彼城東塔殊勝遊龍山褰衣甫二級頓覺小闌闌肩  
摩螳蟻集比屋蝸居繁田疇類龜坼種稊於菟斑秦山  
翠屏列秀水練帶環微雨從西來寒風襲衣單况遭禽  
鳥聒阻我相躋攀上人好儒雅展席花林間清醑泛幽  
菊新粢勸加餐緬懷運兔靈立倚中朝班遘屯離蹇來  
僑寓南湖灣初依遂考槃菽水歡慈顏叨陪賢使君盡

此一日間鈎詩寫青竹日落方知還

題張外史詩卷

不識華陽舊隱居高情還憶聽松餘百篇真錄脩都徧  
滿卷新詩手自書一去丹臺閒日月幾回飛珮在空虛  
重來化鶴應無恙華表春風動里閭

張學訓翼

翼字翔南先世建德人徙嘉興篤學好古博極群  
書屬文敏捷好爲奇澀語至正乙巳薦於鄉與金  
綱俱以龍門賦中高等舉甬東書院山長不就明  
初徵入禮局事竣賜白金歸洪武三年郡庠延訓  
諸生其家居近宣公祠庭有鉅梓顏曰梓宇同局



梁石門撰記釋雪廬有詩著有梓宇集不傳

題徐良夫遂幽軒

遂幽軒人古冠裳乃在具區之陰穹窿之陽山中雲深  
白日永睨視濁世憐匡勸行人摩肩車擊轂耄穉不得  
怡康莊紛紜鬼朴徒夸術相比行列居狎吳姝彈絲歛  
笙簧珊瑚木難貂裘子寶釵九雛集鳳凰燒燈接席不  
知曙斯盡彷彿雪沃湯是時軒人起視夜山外碧海天  
鳥翔遂幽之志始獨着彼嗜富貴俱茫茫山幽谷寂衆  
鄙厭此足慰意躬徜徉西山朝來致爽氣東柯茂林延  
疎光一塵不起萬籟寂歛輯縹簡清琴張劃冥虛室皦  
生白嗒然喪我幾坐忘喫皦似太古坦道無斂穀陽和

渙解凍泣息條風煦日花吹香干佳無人塢墅羨峰迴  
岫轉飛嵐長溪明遶岫路不斷三十六曲春洋洋流目  
綠空澄具區入浩蕩放舟縱所適擊楫歌滄浪洞庭春  
撞竊隙穴林屋曼僻苔花蒼左招浮丘右安期振衣矯  
首望八荒乃知天壤間遂幽樂無央此樂我可圖脫屣  
蠻觸蝸角塲凝邀雲臥高敏君握手徑躡穹窿岡岫巾  
軒中一長嘯神遊太始朝羲皇

鬻石篇同張仲簡賦

二儀磅礴氣鬱積土壤精英乃爲石由來萬植有竒趣  
平地峰巒皆兀砒淵哉至人心妙與元氣并謂茲屑凝  
胚渾各有始塊石礫砢欲與造化夏相成山中歸來一



茅宇束薪餼泉夜半煮蒸浮爲雲潤爲雨追工補天天  
莫補五色徒鍊神鬼泣巨爐呼風鼎水立元氣淋漓漲  
空溼飛丹射瞳光煜熠至人之心澹以寧呼吸萬籟收  
風霆殄和導氣窺黃庭枯腸歎飫苾角生隱文秘訣不  
可徵淡函內藏歸穀城

爽溪樓

寺下幽溪小登樓亦爽神檐虛多受月天近不生塵唐  
代風光遠宣城氣象新何時暫棲息瀟洒一吟身

賦得韭溪春水送張別駕

春風吹花澄海門韭溪雨足浮春雲碧漪分流入城去  
石欄倒豎玻璃紋使君青驄駐溪側搥鼓官船送行色

片帆直溯五湖風水晶宮中夜吹笛

題蔣灝画翎毛

曾向山中倚玉闌瓊葩相映碧琅玕翠禽啼破香雲夢  
別有春風釀早寒

西湖竹枝詞

南高北高峰頂齊錢塘江水隔湖西不得潮頭到湖口  
郎船今夜泊西溪

徐教授一夔

一夔字大章天台人博學善屬文危太樸在元時  
嘗言于朝授建寧路教授元末避兵於郡之白苧  
里有屋三四楹牖外有一大柞因作獨柞軒記以



見志錢塘潘時雍題一詩曰瀟灑幽軒面水開軒  
前老樹倚雲栽閒來倚杖過三匝醉後支頤看百  
迴風雨欲隨龍化去雲霄常聽鶴飛來結鄰凝共  
榮枯事遮莫人知是散材明吳元年以詔至都時  
方置三局一曰律局定律令凡舊官練於憲章者  
居之二曰禮局究禮儀凡宿儒通於古制者居之  
三曰誥局謨誥命凡俊才優於文辭者居之一夔  
特撰誥文賜蟒衣綵幣縉紳欲薦入禁近堅以足  
疾辭終杭州學縣教授有始豐稿嘗作賀表有云  
光天之下又云天生聖人爲世作則太祖覽之大  
怒曰豎儒乃如是侮我耶以生字光字作則字聲

律犯忌欲坐以不敬禮臣請曰草茅不知忌諱乞  
宥之并請欽定表式頒示天下從之

送崔孝子南海尋母詩

崔生秦川來面有憂戚姿問生何所爲念母無已時母  
今在何方南海渺天涯涉川水增波陟嶺路多歧區區  
寸草心不敢辭險危晨昏霜露零夕息烟火微去去一  
萬里視若跬步爲人生穹壤間母子故相依胡爲若鴻  
燕南北相背馳白日行中天寧不照所私願言崇令德  
遠大以爲期

甲辰九日東塔登高得高字

澤國豁平野何地堪登高蕩舟且出郭逾彼東城壕夷



猶六里塘悠然見林臯云是故賢宅閒世居方袍乃遵  
游龍街鞠爲茂蓬蒿摠衣歷層塹凭闌瞰秋濤講師雅  
知已採菊酤新醪懽餘發清嘯屏息塵務勞同遊漱珠  
玉白首徒自搔

題破窗風雨圖

疎窗久零落亂帙自縱橫方與聖賢對那堪風雨鳴乾  
坤含暝色林壑度秋聲想子心如石看書夜到明

題徐良夫遂幽軒

臨風一讀遂幽篇鄧尉穹窿在眼前愧我未安三畝宅  
思君欲問五湖船春明載酒穿花陽日暮扶藜看稻田  
多少長安軒冕貴枉勞魂夢到林泉

訪玘法師宿夕佳樓詩

寓縣俄多難湖山亦被兵名藍俱泯滅別構獨崢嶸翰  
墨看前輩登臨愧後生嚴城圍列嶂半鑑出澄泓直篠  
侵檐上織蘿附牖紫倚闌雲鳥度極目鏡天平日夕景  
逾好秋高思轉清殘陽樹間沒薄靄水邊橫紫翠霏微  
合丹鉛點染成茅津有漁唱麥嶺少人行暝色松門動  
寒飈竹嶼鳴踈鐘度餘響遠火露青熒仙梵微微出鑪  
煙裊裊輕山盤堆露實石鼎泛雲英洗濯塵凡近歸依  
誓願精行當陪竺士聽法破無明

寄題陳彥兼春草堂

青青草色映簾帷壽母朝朝玩綠滋有句不綠春夢得



旁人錯道謝家池

丘侍郎民

民字克莊廣陵人。家饒于財。一時同里諸彥多事  
徵逐。民獨從師友以學問爲事。及揚州被兵。攜妻  
子奔浙西。僑居郡中。入庠序。訓生徒。自給。至正壬  
寅。用流寓籍。以毛詩就試。與選。徐大章及雪廬作  
序賦詩送其會試。明洪武初。爲松江學校官。殷孝  
奎有踏雪入坂城訪丘克莊詩。顧謹中曰。余年十  
五游郡庠。當時爲師者。全公希賢。丘公克莊。楊公  
孟載。貝公廷瑤。魯公道源。包公叔蘊。皆一時名士。  
由是慕學之士無慮千數。松江一時文風之盛。不

下鄒魯後。民官至禮部侍郎。樞基瓜洲逢丘克莊  
詩云。江水靚如空。江花冷未紅。憐予猶客裏。羨汝  
已鄉中。白苧青衫雨。烏紗短帽風。不須揺艇子。垂  
釣五湖東。

周玄初祈晴詩

闕逢歲之半。白侵白如烟。野人不敢出封戶。聽雨眠夢  
跨蒼精。龍六丁相後。先手持五色石。直欲補漏天。剛風  
忽引去天門。方洞然。忽見一道士。青眉長娟娟。綠章寫  
紫霞。稽首上帝前。上陳太守辭。下述萬姓瘡。稔無一尺  
苗。潦涵累百廛。陰霓走白日。黑蜮噓長川。百恠不自悶  
三光何由宣。帝怒叱力士。磔裂無畱連。即遣東王公。高



掣義和鞭金雞。恍驚覺日出。搏桑顛。

題柯博士竹

奎章閣下文明日。遍寫琅玕寄遠遊。疎雨夜啼湘女淚。飛鸞朝下羽人丘。月移簾影金閨夢。風度簫聲玉宇秋。幾見画图憐往事。碧雲零亂使人愁。

和顧阿瑛平湖草堂詩

十二行窩揔是春。平家湖上艸堂新。養來白鶴須教舞。浴出花驄不受馴。桂樹漫歌招隱士。鹿門今屬楚龐人。錦囊合貯詩千首。聲價流傳海內民。

送友人之杭

又隨南雁度錢塘。不道并州是故鄉。江上秋風蓴菜美。

山中春雨石田荒。杜陵老去寧忘蜀。江總歸來不是梁。欲采芙蓉贈君去。錦雲零落倚淒涼。

孫司業作

作字大雅後以字行。夏字次知江陰人。至正末挈家避兵於吳。盡棄他物。惟載敕書兩篋而已。張士誠聞而廩祿之。以母病謝去。衆爲買田築室於淞。後爲嘉興府學教授。遂寓居南湖。明洪武六年。用禮部尚書牛諒薦。召修日曆。書成當授翰林編脩。以老病乞外。除太平府教授。八年。選天下學官內任。作與焉。廷對第一。授國子助教。明年分教中都。又明年召還。又明年陞司業。作爲文醇正。謹嚴。弗



尚異同或數年不獲一字及遇得意窮日夜筆硯  
不輟著書十二篇號東家子宋景濂比之法言通  
書詩亦奇僻古雅有滄螺集六卷

謝馬善卿送菜

嘗欣食菜美自謂肉不過今晨齒頰間屢嚙安敢唾持  
梁嚙肥鮮野籟誰當課使君可憐人異味諳小大我本  
江南樵酸寒羨不和空腸轉藜苳糲粟連穰穰雨韭春  
割苗霜菘秋飮座羊蹄釀旨蓄蒲歎雜細剉芋魁掘地  
底芡首洗泥科木魚三百頭竹筍一萬箇朝湘出山厨  
夕煮吹烟銼堆盤青黃具入口生澀柰以茲媚盤餐頗  
復如君作採之諒有時蒸或躬自佐白鹽點葱橙紅椒

羅曰磨蔗錫質劑調醞醢芳辛破香飯炊屢熟宿酒醒  
方餓鵝掌推不受鶯裙空欲蛻饋案連十罌飽食淡自  
荷霜根咀寒蘼三嘆論奇貨水壺奪仙厨適口騰軒簸  
四海一東坡拙謫常坎坳參軍半畝菜詩句劇嘲賀我  
蠢不償一造物知何那抱甕力不任負鋤筋苦墮亦欲  
賦歸田自種百畝稔傳君作菜法華瓷檢封裹食勤不  
愧天日晏從高臥

夏日與諸友文燕

平生四海交佳友一二數蚤年識黃九

黃叔

詰屈盤新

句爛熳多文辭晚復親李杜

李可久  
杜子才

墻東避世公

王原

十載

厭城府暇時得相過雖夕款蓬戶太丘兩佳兒元方吾



所慕

陳希文

半升折足鐺白石日夜煮低頭誦經史未覺  
霜月苦今春一相逢春色動眉宇從師入天台擬讀與  
公賦我行適四方日與樵牧伍敲門三益友驚散林下  
鼠一呼未即衣再呼那及屨起陳四席坐李杜黃及子  
相對出肝腸遂忘親寡旅上馬來及晨投轄過映午談  
諧肘腋腕拜跪肅樽俎歷數座上客坐欠兩公語兩公  
今何在江湖渺修阻缺然蟪化蝶又似蟹迷駟會合疑  
有時交親不在故凡此宿昔契每懷連牀雨誰知一餉  
樂竟違通昔晤誓去挽莫畱盡日空詹竚

飛魚

有序

暨人航海得飛魚于黑水之洋其長二寸頤兩鬚各

廣長寸餘張爲兩翅海風發作從波濤飛集船上如  
燕雀既止則不能入水意者爰居海鳥亦此類歟莊  
周所謂鯤化爲鵬不荒誕也爲賦一詩

海於天地中物不能比大陰陽浩出沒造物窮荒恠力  
足浮三山勢欲吞大塊豈惟日月浴兼疑鬼神會披經  
案山海異族紛瑣碎我時一徘徊足躡二儀隘焉知賈  
客輦入海如入闔風昏白波駛雨慘黑洋邁批石噴火

發

海船夜投物

波中如火烈

舟人見海怪則指

飛魚集檣桅

翅尾錯珍貝初疑燕雀翻復駭蝗螟墜非類感所希枯

腊拾海外三韓雨露洗百鳥風烟帶參差插雙翰歌側  
張兩旆形模小鮮具意氣鵬雀類祇慙海若笑狹小矜



此輩我復嗤海若萬彙同一態神靈數巨魚鯢鯨鮪鱈  
鮪智屈雲雨能肉大何足膾龍門萬魚躍此翼吾所快

菽乳

豆腐本漢淮南王安所作惜其名不雅余爲改今名  
因賦是詩

淮南信佳士思仙築高臺八老變童顏鴻寶枕中開異  
方營齊去聲味數度真琦瑰作羨傳世人令我憶蓬萊茹  
葷厭葱韭此物乃呈才戎菽來南山清漪浣浮埃轉身  
一旋磨流膏入盆壘大釜氣浮浮小眼湯洄洄頃待晴  
浪翻坐見雪花皚青鹽化液滷絳蠟窟烟煤霍霍磨昆  
吾白玉大片裁烹煎適吾口不畏老齒摧蒸豚亦何爲

人乳聖所哀萬錢同一飽斯言匪俳詼

還陳檢校山谷詩

蘇子落筆奔海江豫章吐句敵山嶽湯湯濤瀾絕厓岸  
粵粵木石森劔槩二子低昂氣不下數澤遂包貙與鱉  
至今雜沓呼從賓誰敢倔強二子角吾尤愛豫章撫卷  
氣先愕磨牙咋舌熊豹面以手捫膺就束縛纖毫剔抉  
難具論宛轉周腊爲鄭朴烟霏淡泊翳林莽赤白照耀  
開城郭沅江鯨肋不登盤青州蠓胥潛注殼洞庭東南  
入无野二儀清氣會有壑士如此老固可佳不信後來  
無繼作我嘗一誦一回顧如食橄欖行劒閣忽聞凍雨  
洗厓厓拍掌大笑工揀摸作詩寄謝君不然請從師道



舊所學

約潘元飛遊惠山

錫谷名泉誇第二江水猶來勝山水中冷天畔隔蒼烟  
九龍眼中差可喜我夢臨此鑿眉鬚裹茗烹煎携綠珠  
老僧麤麤妙而臞忽來說禪坐跏趺三生豈是舊緣法  
明日買船當下牖共君烏紗一裹頭野岬春洲看晴鴨  
歸帶惠泉邀諸友茗飲

江南浙山俱可人澤比惠泉常入夢昔年濯足望具區  
船頭百折頻遮送高情數與此山期舟不衝風雨尼之  
天公忌人如忌疾十年欲去事長違昨宵拄杖落林谷  
画舫載泉羸百斛爲倒龍堂明月珠共試蛇坑小蒼玉  
故人談頰翻如河舌本黧枯知奈何此泉此茗不易得  
緩飲緩煎還可過人間酒肉誰厭臭我味此泉渠閉口  
身如瓠壺過渴羗慎勿與方傳不朽

送人往宣城

送客宣城郡吟詩憶土風雪膚銀杏白火頰木瓜紅楚  
殿荒山裡澄江出樹中君親三載仕我友一樽同

沙上

百年神物會出此遠人邨浪淘江翻屋沙崩樹嚙根芋  
魁鋤地底鹿角長溪痕開闢當天意瀾茫恨土吞

大堤曲

君騎白馬來我騎青驄去背面不相識兩馬驕嘶住



大年雨中見寄二絕因次韻

十載青春伴旅遊無田安敢羨歸休夢回讀罷凄然句  
正似彭城風雨秋

筆端江浪貯雲烟愛汝新詩字字傳為報客懷無一事  
日憑花鳥喚春眠

元夕寄先輩

碧沙官渡柳搖新燈火蕭條不負春誰道黃昏先閉戶  
天街雪色最宜人

題雲林溪亭山色二首

過兩山如罨画明溪聲直到白雲亭雲遮不斷溪聲去  
流出平蕪兩岫青

白髮雲林老画師一生辛苦竟誰知何須更上峰頭望  
滿目清秋滿目詩

丹厓居士唐肅

肅字處敬自號丹厓居士山陰人至正末授黃岡  
書院山長轉嘉興學正遂家焉高啟有送唐博士  
移居樵李詩云楊柳發初齊春陰廢院西故人乘  
醉別新鳥傍愁啼舟重全家去詩多一路題杏花  
開北郭誰復共招携其自作輓郭秉心詩亦有吾  
昔居秀州友有徐一夔句明初以薦擢為編修罷  
歸卒肅文章稱大家時有唐劉毛蔡之目行尤脩  
飭縉紳咸推重之有丹厓集



和牛士良

咽咽銅虬水瀏瀏青瑣風掖斜觀斗轉簾疎望月空出  
門步清影循階行露叢睠此光霽景感予微渺躬觀國  
豈非願懷親方蔚仲

題張孟兼所注西臺慟哭記後

宮中六夏初罷鼓藍田璽玉沈崖浦廬陵忠肝一斗血  
去作燕然山下土桐江水落秋日頽有客歌上巖光臺  
石根敲斷鐵如意萬里北魂招不來西風又涸灣河水  
故老寥寥知者幾珍重睢陽季葉孫箋簡能裨兩朝史  
智伯頭飲器歌  
飲伯頭此伯鬼伯死寧知頭作器玉盤酒滴猩猩紅血

波倒浸泥丸宮雷吼無聲電睛墜伏犀骨斷漆花膩老  
龍一吸銀海澁飲闌擲杯怒髮立英魂夜半不敢泣君  
不見君漆頭臣漆身恨君藍臺爭諫臣

秋江曲

妾家住銀塘石楠秋葉香憶君蕩槳去江水與愁長西  
風夜泣蒨花露鴨嘴岸低人不度冷荷如鍼刺烟素鴛  
鴦飛來瀉鷁去

過漂母墓

昨日下午淮河船河流滾滾不見天逆風一日行十里黃  
牛黑驢牽不前今日過韓信城城邊蕪荒田不耕人傳  
韓信此發跡至今城畱韓信名當時乞食向漂母母哀



王孫心獨苦一朝富貴報千金不記淮陰少年侮我來  
不弔韓將軍悲歌獨弔漂母墳英雄貧賤少知己不在  
男兒在女子

劉松年山居圖

曾逐大茅君峰頭臥古雲鳥青呼作使崔白養成群客  
較丹砂法童窺玉券文近來烟火斷花氣作爐薰

賦海東青應制

雪翮能追萬里風坐令狐兔草間空詞臣不敢忘規諫  
却憶當時魏鄭公

題陶穀郵亭

紫鳳檀槽綠髮娼玉堂見慣可尋常作歌未必腸能斷

明日聽歌更斷腸

題柯敬仲竹石

緼真齋裡揮毫日多得青城太史題今日南州把遺墨  
石篁秋冷螭蛄啼

沈知縣鉉

鉉字鼎臣錢塘人元末道梗與同邑陳世昌俱畱  
於禾鉉博學邃於春秋洪武初知石首縣高啟沈  
徵士鉉野亭詩云清時猶在野獨臥見高情移艇  
聞烟唱鈎簾看雨耕江晴雙鶴下樹晚一牛鳴回  
首徒相憶柴車不出城楊維禎沈處士林亭詩云  
楊花作絮撩行路荷葉流錢蓋野池黃鳥一聲啼



書寂不知春。春去幾多時。鉉二作及陳王五詩皆咏  
未中名蹟。並見柳志。

真如雪霽

祇園雨。瑤花宰堵削寒玉。崢嶸聳層霄。皓彩炫晴旭。變  
幻境。非真忻然寄遙矚。

秦山遠翠

考見  
題咏

出門無寸矚。凝望立溪灣。修眉在天際。料得是秦山。

陳銘

銘無考

春波漁市

考見  
題咏

瀕溪有居廛。竝岸角競艤。風含水氣腥。曉作漁人市。魚

美何處無。無錢買金鯉。

西驛歸帆

考見  
題咏

帆收麗橋邊。暝色已帶浦。臨波據胡牀。且聽官船鼓。

三塔晨鐘

浮圖枕龍湫。飛觀出雲杪。鏗鐃吼華鯨。聲震禪林曉。淵  
靈歛陰氣。扶桑日將杲。

雙溪夕照

溪分燕尾流。中洲吐龍舌。落日飈彩虹。飛梁影橫截。憑  
闌且遲畱。東望待出月。

王峪

峪無考



東墅歸鴉

別墅荒涼落木秋寒鴉投暝客歸舟斜陽流水孤邨路  
不是離人不解愁

高尚志

詩見金蘭集朱檢討云尚志異志之弟

題徐良夫遂幽軒

閉跡銷聲與世疎巖居蕭散屬潛夫竹間展席移茶具  
花底清吟擊酒壺喜向山林便野服懶因軒冕溷泥塗  
令人長憶鴟夷子欲趁高秋泛五湖

至正庚辛唱和詩

并序

人情莫大乎歡戚而情之歡戚則又係乎時之治

亂何者當其亂也雨覆雲翻天地否閉對此茫茫  
無復生理雖有花晨月夕適足動我之感愴歛歔  
及其治也上清下寧日月開朗耳目所遭無非佳  
境雖當凄風苦雨皆足助我之酒腸吟思此二者  
無他當由情以時證時從情得如知情之歡戚可  
以卜時之治亂矣至正庚辛唱和詩爲嘉禾同守  
繆君廣文曹君偕諸名輩分韻之什也讀其庚子  
兵後之作則知方岳匪人苗獠驕肆悲音於邑何  
其戚也比讀辛丑避暑之作則藩衛有人民庶樂  
業逸興超舉何其歡也蓋其爲時不過一再踰年  
而二十八詩之歡戚頓異要亦一係乎人焉耳矣



余奉使以來稽滯歲月每每以損辱使命爲戚乃  
者太尉公順承皇命報使有日爲歡可知適舟過  
攜李以方外故知新公請序此詩不覺因已之歡  
戚有觸於此詩且知詩可以觀時之治亂若著蔡  
如此鄱陽周伯琦序

至正己亥兵後明年庚子八月之望同守繆公招  
同諸彥小集南湖以杜甫不可久畱豺虎地南方  
猶有未招魂爲韻人得一字即席而成亦足以紀  
一時之變且幸此會爲不易得云爾承事郎司農  
右丞郁遵識

繆同知思恭

思恭字德謙吳陵人至正間爲郡同知丁酉張士  
信來攻檣艣蔽天排川而下思恭於杉青閘東西  
岸積葦以待時南風大作岸上舉火敵舟焚燎至  
四十里治郡三年民大悅服終淮安總管  
得不字

我生胡弗辰守土愧簪黻亂離歎斯瘼兵氛駕飄拂貴  
臣既防求苗獠薦驕佛比戶羅毒淫流殃痛未訖大軍  
有凶年荆榛莽蕪鬱天地塞無歡三秋翳沉沕當國哀  
黎氓方來濫朱紱所冀民社寧優詔非爲屈頓覺元氣  
清太空如蕩被借問今夕娛還思去年不

高翼志已見



得可字

皇風遘中否微命亦遷播豈謂託喬林依然駭烽火前  
年奔山谿去年匿檣旆妻兒怖欲死崩憂不知我賴此  
干城將揮戈挽將墮趙佗既足王天子詔曰可人能閉  
殺機三光自寧妥湖波瑩宵鑑芙蓉顛秋朶且共醉明  
月狂吟莫還舸

徐一夔

已見

得久字

青丘緩亟殪黑颺撼九有海立翻蛟宮山飄若螳走雖  
愛赤城霞噴瀑當窗牖棄擲不敢顧欲臥豈能久孤翔  
覽德輝于焉得林藪衍原饒粳秫詩書足朋友何期復

中兵難作在丁酉東西競奔竄顧尾不救首幸公全此  
軀常疑是夢否還見湖上月兼之對名酒狂奴有故態  
噓然開笑口

姚教授桐壽

桐壽字樂年桐廬人博學多才識元末為餘干教  
授與僚友鹽人沈穀善結姻盟穀死攜子就婚值  
世亂遂寓居豐山之陽與雲間楊廉夫嘉禾貝廷  
臣潘澤民張子晦本州楊友直遊時于春林夏澤  
尋討舊蹟著有樂郊私語

得畱字

驚波蕩四海桐江失安流睠言秦溪側因依有舊遊魚



鹽庶混跡暫忘兒女憂寧如王仲宣洵羨不足畱飛塵  
俄焱舉吹動城南樓閉景層闈裡歸魂故山頭  
無死重見湖邊秋白月漫相笑誰無歡與愁

釋克新 另見方外

得豺字

大千一塵劫刀兵動三災修羅搏日月兩間塞風霾舉  
目何所見莫非狼與豺生民飽湯火像教淪灰埃世道  
既交喪大塊何爲哉非仗威德尊誰闢乾坤開南天埽  
一隅清光濯人衷雖見舊時月風波尚喧唼諸公賴經  
世好爲蒼黎哀我將從此去杖錫尋黃梅

江漢 已見

得虎字

文淵客西河幼安寓遼滸中原雖版蕩兩鄉若安堵予  
從稽山來寄家鴛鴦浦謂當侶魚蝦何知鬪蚪虎操艇  
匿菰蘆不敢歌萋楚須臾雷雨動群妖碎天怒歸看窗  
中月依然挂當戶遠人慙未賢良由得所主

陳世昌 已見

得地字

寄家樵李城情爲姻交繫時登城上樓吳山望天際去  
年向西湖重尋烟水契驀聞兵變起諜問若天墜舉足  
不敢前念之心欲碎兼旬難方解歸舟急偏滯半道聞  
鄉信十言九不是踉蹌入郭門閭闔成赤地到家見妻



孛喜極翻涕淚具言鄰公衙吏兵救逾至男女十九人  
幸免毒蜂刺琴書賴復完踈狂夏容肆翹手見輝光恍  
惚疑夢寐

鮑恂已見

得南字

舊業帶郊牧受時勤耕蠶傾筐董機女負耒責諸男得  
酒共慰勞中堂相與酣醉從草窗裡遠看函山嵐交遊  
恨濶絕引領望東南瞥見穿雲燧惶駭憂何堪孤帆川  
上來問之且再三爲言脫巾呼大亂由凶貪燒城但餘  
堞流血瀦爲潭裛我同心彥驚淚不能含何圖共明魄  
相對重高談

樂架閣善

善字爲之岳忠武王之後當時有所避忌變聲爲  
樂元季寓嘉官江浙行中書省架閣庫管勾受知  
於平章政事徹里帖木兒因哭其父左司員外嘔  
血而卒

得方字

伊余本竒薄受知徹平章親老繫微祿羈宦在江鄉一  
朝不得志投劾歸山莊豈謂逢亂略松菊萎兵荒平川  
鬪波浪衍陸成太行故園窅難覓蕪沒在潯陽中原漸  
陸沉懦將空鳴張翻增紹興恨血戰念家王月色似爲  
苦淒淒滿中方今古成浩歎涕落沾衣裳



金太守綱

綱字子尚嘉興人元舉鄉試明洪武中歷蘇州守  
百姓苦官民田則輕重不齊里胥爲奸綱上疏請  
減重額得罪賜死子穎伯克傳家學嘗從俞紫芝  
遊以能書見稱于時

得猶字

妖狐叫夜澤欃槍照神州大地無完郭人血當川流四  
塞失危阻况乃此平疇林垆盡野火園榭爲荒丘奔竄  
竟何所進退徒夷猶不有良守牧何以得依劉仰面見  
明月清光似召侯既照我心曲還慰我離憂

潘府史澤民

澤民名著以字行其先大梁人扈宋南渡占籍我  
郡中至元鄉試備榜補吳郡甫里書院直學已而  
北走京師遊公卿間薦爲行中書省從事黃晉卿  
王思魯陳衆仲皆作詩送之至杭丞相府以常選  
俾錄廣德儒學三年改諭銅陵辟吳興郡幕力辭  
因留主郡學再辟浙東元帥府史病暑卒  
得有字

少小客燕趙南北事奔走蓮花與叅從菁莪長生友風  
塵撲人面荆綦掣人肘棄却頭上冠歸種門前柳門前  
柳未綠鶯訝驚風吼豫章隨飛蓬喬松若摧朽况此初  
生稊吹落竟何有春陽賴萌動翠色仍如箒還將舊時



月夜夜當窗牖始信蔽芾陰可以覆衰叟

殷統軍從先

從先不知其世系官代但詩有猥屬勤王師之句  
蓋亦當時與張平章士信處統軍撻伐者也又觀  
其姪原善與雪廬和尚書云聞已蒞軍武林與平  
章公不甚相協想不日投劾作抽身計原善之兄  
近仁明洪武間叅政

得未字

處治則憂賤當亂必逃貴所憂自狗耻所逃實多畏昔  
余在泥塗意欲干井胃帝聞乃齋怒推排奪人氣奪  
不可伸抑鬱夏誰謂恨不如梅生早謝南昌尉歸來閉  
門臥門外扶羅罽猥屬勤王師何以息鼎沸明月如向  
人問我進耶退貴賤兩弗居癡人醒還未

朱處士德輝

德輝無考其詩有嬌女殉節語大抵女死苗軍耳  
嘗築室讀書顏曰存道齋雪廬爲之記

得招字

種梧在東園邀月庶逍遙月色如我心梧枝寫風標十  
年坐此下攤書悟寂寥理復竟成剝晏極生塵勞兵凶  
起衽席豺獍恣咆哮兄弟忽星散骨肉紛號咷還憐有  
嬌女殉節不可招義命委善敗肝腸故摧燒自謂閒園  
樹野火等蓬茅使君不陳力安得坐今宵



郁右丞遵

遵字子路郡之永樂鄉商陳邨人元末官承事郎  
司農右丞

得魂字

曠仕愧無補甘讓桑孔尊歸臥青林下猶然蒙國恩有  
田可種秫有室可避喧問余家何所家住商陳邨邨南  
遶溪浦屋後榆柳蕃莫帆急歸鳥朝日滿平原鼓腹循  
臯隴看雲池上軒人傳有兵燹焚劫痛煩寃門巷走狐  
兔墟里多遊魂老人竟高臥何必尋桃源願乞甘棠枝  
和月種田園

至正辛丑秋七月十有三日永嘉曹睿以休假日出

西郭憇景德寺諸公攜酒相慰藉環坐以唐人因  
過竹院逢僧話又得浮生半日閒之句分韻賦詩  
雲海師哀集成什以志一時之良會云

吕安坦

安坦未詳

得因字

人生苦易別良會悵無因况復牽塵事悒悒不少伸今  
日是何日涼飈度蒼旻薄言攻我車縱步西城闈行行  
抵龍淵蕭寺誰與隣波光蕩秋色修篁淨無塵覩茲風  
景殊不樂空逡巡開尊有清醕列坐總佳賓笑談雜諧  
謔醉酢見天真開士雅投分延欸倍情親醉來歡自劇



詩褒浩無垠賦此紀同遊重過卜佳辰

鮑恂 已見

得過字

凌辰訪古刹幽氣集林阿雕甍旭日眩紺宇晴雲摩蹠  
松奏竽笙脩竹鳴佩珂禪友素所識名流喜來過俯澗  
漱寒溜陟磴捫翠蘿瀹茗佐芳醕玄談間商歌遂令塵  
土懷如濯清泠波斯景豈常遇追遊亦無多流光逐奔  
瀾飛翼援高柯賦詩畱苔壁千載期不磨

牛諒 已見

得竹字

靈湫閔馴龍古殿敞金粟僧歸林下定雲傍檐端宿伊

余陪雅集於此避炎酷息陰悟道性習靜外榮辱坐石  
飛清觴每歎白日速別去將何如詩滿青竹

釋智寬 另見  
方外

得院字

涼飈動新秋遠寺集群彥虛檐靈籟發列坐停揮扇情  
愜引杯觴懽劇雜酌獻醑顏映落日林光散凌亂池溪  
魚自樂林密鳥相喚芳桂板幽叢天香滿西院裏哉鄭  
廣文樗散絕崖岸

常真 已見

得逢字

逃炎恨無地偶憶西南峰梵宮隱林麓散我塵外蹤人



生晤會難盍簪豈易逢于焉遂招搖唱詠偕從容冠帶  
與遊盤不遺采菲葑促席注華觴寧須侑丰葦有酒當  
盡歡轉盼成飄蓬

丘民 已見

得僧字

上方鬱嵯峨遙睇青雲層餘霏不成靄朝陽射觚稜雙  
湖鏡光徹涼飈滌煩蒸輕裳欲飄飄短髮仍鬢鬢縱觀  
極夷曠頗覺秋氣澄載瞻雷音堂招搖肅高僧英英竹  
塢雲耿耿蘿龕燈攏瑜天花滿爐香夕烟凝散坐百慮  
息幽懷詎能勝澗泉煮芹葵山盤羅芡菱伊余風姿羨  
歌遊厠賓朋世事良可嘆有酒當如澗

張翼

已見

得話字

郭遠樹稍陰野曠秋始屆舟迎浦上迅愠釋林間快紺  
園幾世闢斷碣何年壞閣披龍象擁壁翳天人畫良朋  
蔚胥集僧衲喜出話談幽貝葉翻襟散袈裟掛池溪浮  
菡萏露晞餘沆漑石田際秔秫秋風偃蒲稗屢愜清賞  
延迫此日西邁篇什志偕遊母云棄菅蒯

王綸 已見

得又字

驕陽秋逾炎屢居苦囂陋出郭謝塵鞅浩氣溢宇宙祗  
園蔭長流松篁倚天秀簪履適相從萍水欣邂逅主人



延客坐芳情重醇耐道合猶通門志洽儼交舊緬懷夙  
塵際東西困羈走餘生獲良會歲月不可又願言慎所  
止同心契蘭臭日薄嗟易昏明當覩清晝

來志道

志道無考

得得字

招提面晴湖出城路咫尺雲林盡蕭爽盤踞神龍宅僧  
開草堂靜崔避松烟碧延賞非俗流清言足佳客飛光  
瞰澄波駐屐亂蒼石嘲咏圖罄歡留連竟忘夕吾徒洵  
疎豪此會寧再得風塵莫回首回首增嘆息

聞人麟

麟字彥昭宋元時聞人爲郡望族特麟無所考見  
尚有輓楊鐵崖詩

得浮字

精藍煥金碧突兀城西陬盍簪適清暇觸熱偕來遊入  
門松檜陰堂背篔簹稠盤礴衣未解已快風颭颭清談  
揮玉塵白戰行詩籌吁嗟百年景汎若波中漚何如齊  
物我斲去邊幅修妙理或未悟當以大白浮

曹廣文睿

睿字新民永嘉人占籍華亭元季爲郡學訓導明  
初遷松江教授有竹枝云昨夜西湖月色多照見  
郎君金叵羅明朝江頭放船去江亭風雨奈君何



著有獨叟集

得生字

清晨出城郭悠然振塵纓仰觀天宇淨俯矚川原平竹  
樹自瀟灑禽鳥相和鳴龍淵古招提飛蓋集群英唱酬  
出金石提攜雜餅罌丈夫貴曠達細故奚足嬰道義山  
嶽重軒冕鴻毛輕素心苟不渝亦足安吾生

徐一夔已見

得半字

野曠天愈豁川平路如斷不知何朝寺突兀古河岸潭  
埋白氣沒林密翠霏亂勝地故瀟灑七月流將半合并  
信難得通塞奚足筭廣文猷官舍亦此事蕭散風櫺爵

屢行蘿磴席頻換但覺清嘯發寧顧白日旰吾欲紀茲  
遊掃壁勞弱翰

尤存

存無考

得日字

厭劇謝塵喧酬心趁曠逸芳辰霽景浮疎林照旭日靈  
飈激虛籟瀨氣還盈溢卉木雜敷榮川流何蕩潏清芬  
吐芙蓉蒼筠密於織幽賞非人間超忽詣堯率憇此文  
室中誰云但容膝禪翁抱冲姿澹然忘得失

周棐已見

得閒字



終歲逐城府常有戚戚顏晨登郭西寺逍遙任踈頑林  
堂含餘清爽塏非人間况茲群彥集秩秩文翰班善譴  
等高咏嘉言振幽孱豈無觴酌歡茗煎亦未慳喧卑受  
物曠志適忘世艱耽留陽景馳飛羽當樹還賞心頗遂  
巡粉慮仍粗關諧此塵外蹤再期永日閒

先生橋李詩繫第六卷終



海

茶

3853